



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com



TAPAK 9

Madhya Pradesh CM-i lumai
longkak ait tenzükogo

TAPAK 12

Jelena-i French open kokogo;
Nadal final tongtetogo

VOL. XIV NO. 233 (ADOK 233)

DIMPUR

SUNDAY

JUNE 11, 2017

5.00

MKR Pillai indang osang nung taitüsü keta lir: ACAUT

Dimapur, June 10 (TYO): Kerala kübok Pandalam nung amenoka aliba Sreevalsam group indang kiojen 30 tashi mita aodang sen crore 1000 dak tema rongsen aliba putetba osang Income Tax kettangsertemi metetdaksüogo. Sreevalsam group kiburji Nagaland nung taoba Addl. SP aser consultant to DGP Nagaland, MKR Pillai lir aser IT kettangsertemi Pillai ji Nagaland nung yimten yimsüsür aser kettangsertem den teyariteper ka ta temulung melemita bilembaji shitak asütsü akok, ta Media Cell,

ACAUT Nagaland-i sangdong ka nung metetdaksü. Yimsüsür aser kettangsertem den teyariteper ka aser Centre nungi aruba senotsü tim mesüi belener ta tai tongloktsüba onüktemji shitak asütsü aser iba ya mapa tulubalen shilem tila ka putetba dang lir. Anungji, IT kettangsertemi kuli kwika bendenteter ta asüba nungji ajemdaker, yimsüsür o kettangsertem tesentaktep yur ozüing alema mapa inyakba yimjak nung metettsü, ta parnokisa ashi. **(Maneni tapak 11 nung)**

India ya akhidang nungi 'Hindu Linük' lir: UP Minister

Ballia, June 10 (Agencies): Honibarnü Uttar Pradesh nung Agriculture minister, Surya Pratap Shahi-i, India ya 'Hindu Linük' ta sangdongtsü menüingdak, kechiyong akhidang nungi iba linük ya Hindu linük lir, ta ashi. Sentong ka nung jembidang pai, "India ya akhidang nungi Hindu linük lir. Anungji iba takhangba agütsüsü menüingdak," ta ashi. Ajisüaka iba sentong nung adener Salempur nungi BJP MP, Ravindra Kushwaha-ibo iba onük nung ola madok. Osangbenertem den jembidang Shahi-i, opposition party temi Madhya Pradesh kidanger state tem nunga aluyimertem longkak aittüsü ajungshir, ta aittüsü.

Tasüingdangba ka langzüdang Shahi-i Madhya Pradesh nung aluyimertem dang longkak maittäser aser azüoktsü mepishi. "Shivraj Singh sorkar mapang nung aluyimba tsütsü ainba shilem 7 aliba nungi 18 tashi kümogo, aser item ajakji sorkari aluyimertem atema inyaksüba ajanga lir. Congress-ibo ibaji küm 55 yimsüsüba mapang nunga meinyakket," ta pai ashi. Paisa, UP sorkari aluyimertem atema mapa balala inyaksüba metetdaksü. Madhya Pradesh nung timtem adokdaksüba Congress aser opposition party tem ajanga lir ta shia BJP MP, Kushwaha-ia, "Parnoki jelia asalentong yangur aluyimertem ajungmeso," ta aittüsü.

BJP-i ano Tir candidate meshim: Amit Shah

Raipur, June 10 (Agencies): Honibarnü Bharatiya Janata Party (BJP) Tir, Amit Shah-i, party-i tang tashi Tir candidate meshim, ta metetdaksü. Tir election July 17, 2017 nü agütsü aser July 20 nü vote azüingtsü, ta Bodhbarnü Election Commission-i sangdonga liasü. Opposition-i NDA nung madenba party ajak longjemer Tir candidate ka shimtsü atema inyakdar. Ato kilonser, Narendra Modi-i Tir candidate atema BJP lenir tain, LK Advani shimtsü atema bilemdar, ta tamalen osang ka proka liasü.

Iba election nung voter ajak agi 4,896 (MLA 4,120 aser MP 776)-i vote agütsüsü temsüa lir. Lok Sabha Speaker-i vote agütsüsü akok, ajisüaka Lok Sabha nung shimba Anglo-India nung anatibo vote agütsüsü makok. Ano Rajya Sabha nunga shima aliba züngsem 12-i vote agütsüsü makok. Tang teinyakdak Tir, Pranab Mukherjee kümsük July 24 nü tembangtsü. Tang tashi nung Pranab densema nisung 13-i Tir inyakogo, aser iba nungji VV Giri-i Tir anaben tashi inyakba densema lir.

Temai adokba NSCN (K) züngsemtem yaritsü: Kiren Rijiju

Guwahati, June 10 (Agencies): NSCN(K) chairman S S Khaplang sür anogo ka lir, Centre-i NSCN(K) nung züngsema aliba India sensotemi ozüing alema mapa inyakba toktsüra, teyari agütsüsü ta metetdaksüogo. "Onoki NSCN(K) nung Indian Naga nung ajak dang temai adoktsü mepishir. Shibaisa ozüing alema inyakba mapa toktsüdir, onoki parnok nem teyari agütsüsü. India sorkari parnok nem 'rehabilitation package' agütsüsü" ta Union Minister Kiren Rijiju-i tanü

osangbener dang ashi. "Telungpurtemi 'rehabilitation package' maongka agia, temai adoktsüla. Ajisüaka, iba nung India-i NSCN(K) nung züngsema aliba Myanmar nung sensotem indangbo mejembir" ta paisa ashi. Khaplang ji NSCN(K) indang mulungjang aser tanüla liasü aser pa medeni telokji tejakleni moutettsü, ta Rijiju-isa shisem. "Tanishir ka melira, telok kati timtem ajurutsü. Tangbo NSCN-K indang aliziing metongtettsü. Anungji, telungpurtemi loktiliba asoshi bilemja, temai adoktsüla" ta Minister of state for Home

Affairs-isa metetdaksü. Khaplang ji Myanmar senso ka liasü aser pa Myanmar nung akhüm liasü. Iba jagi India nungi telungpur teloktemi S S Khaplang akhüm kübok Myanmar nung jenoka lir. Anungji, pa asüba ajanga item teloktemia tetsükdaksü ajurutsü" ta Rijiju-isa ashi. "2015 küm India sorkari NSCN(K) telok nokdangba sülen ceasefire agien. Nagaland, Arunachal Pradesh anüdoklen, Manipur aser Assam nung tesem kar nung parnoki timtem agütsür. NSCN(K) ji ozüingi nokdangba telok ka lir," ta Rijiju-isa shisem.

Nagaland CM-i anir telok aser kijatemi asür SS Khaplang mang ayimer

Dimapur, June 10 (TYO): Nagaland Chief Minister Dr. Shurhohelie Liezietsu-i NSCN-K tanishir SS Khaplang asüba atema mangyimba metetdaksüogo. "Yashi nikongdang Myanmar nung SS Khaplang ajungbena asüba osang angashia kanga aoksar aser temulung raksar. Naga yimten tebilemstü angatetteptsü aliba mapang ka nung Naga nung lenir tongtipang Khaplang asübaji tesasatsüka lir" ta Dr. Shurhohelie-i sangdong ka nung ashi. "Naga yimten teloktem ajak longjemer India sorkar dang asenok taginüba ashitsü mapang ka tongogo" ta paisa shisem. NSCN-K-i India sorkar den ceasefire agienba sülen,

Nagaland sorkari Myanmar nung NSCN (K) lennirtem den ajuruteptsü atema teshimtet telok balala aiben yokogo, ta chief minister-isa sangdong nung ashi. Naga yimten tebilemstü tekaratiba nung latettsü atema onoki NSCN-K dang India sorkar den yimjung olemtep nung adentsü atema asüingdanga arur. Ita ishika tejaklen, asür Khaplang-i tagitsü onüktem denra, India sorkar den olemteptsü mulunga lir ta ashi, saka iba dak sendakba maparen ano metenzük lia, pa ajungbena asüba atema kanga sasar, ta Dr. Shurhohelie-isa shisem. "Tasür nem tetushi agüja aser pa mang ali nung maremdang, ni Naga nung ajak dang, asen Naga yimten tebilemstü atema

telemtetba ka agitsü atema tenangzükba agitsü aser bendanga agütsüsü ayongzük. Asen lenir bilemteta aser tetushi agüja, asenoki yimjung, putepa aliba aser Naga nung ajak tiptema alitsü atema bendanga agütsüdi. Asen lenir pa taküm piyong Naga nung atema inyaka aruogo, anungji pa nem tetushi agüja aser asenok taküm alidang Naga yimten tebilemstü atema telemtetba ka agitsü merangdi" ta paisa ayongzük. "Sorkar aser Nagaland nung alirtem ajak tenüing nung, ni tasür kibong den asükhu lemsateper aser Tsüngremi parnok nem tesünep agüjang ta sarasademtsür" ta Chief Minister-isa ashi. **(Maneni tapak 11 nung)**

AKM-i Imtiyapang aser Shilukaba na nem tetushi agütsü



Tenüingsang agütsüba sentong ka agir külen NSF nung shimer Imtiyapang aser Shilukaba na den lokti balala nungi tenzükertem aser sentong nung shilem agirtem noksa nung angur. Mokokchung June 10, 2017

Mokokchung, June 10 (TYO): Tawa Tzurangkong nung Naga Students Federation (NSF) lokti mungdang alidang, NSF nung tongti zülur asütsü Sp. Imtiyapang aser metetpela zülur asütsü Sp. S. Shilukaba Longchar na shimtetba nungtem nung Ao Kaketshir Mungdangi tena nem tenüingsang aser tetushi agütsüba sentong tajung ka AKM senden kilem nung ayongzüka agiogo. Tanü iba sentong nung taoba NSF tir Sp. Imchatoba Imcheni

tajungshi o jembidang, NSF sabang ya tila ka dangbo masü kechiyong iba sabang yagi Naga nung songjen atema inyaker, anungji, Naga nung arok ajungtsü asoshi nükla yur meranga inyaksü, pai tayongzükba ka agütsü. "Nena ya AKM meyonger kaka lir, anungji, inyaksangshi ajak nung talisa keno balala adokdang AKM den tongtepretepa inyakang", ta paisa inyakdaksünüba o ka ashi.

Paisa NSF inyakyim tongti kar lemsatepdang, kaketshir terenlok maparen balala den repsema NSF yagi Naga yimden tebilemstü atema ya temulung agüja arur, iba den ano state aser centre sorkari sentong (policies) tapu balala yangluba nunga shilem agitsüa akümer, ta ashi. Iba ama maparen balala inyakdang shisa kaa inyaksü asoshi paisa tekümdangtsü kar dena lemsatep. **(Maneni tapak 11 nung)**

**TANGATETER
OCHISHIR
JAKLA TAJUNG AKETBA
ASER
NÜBORTEM DANG KANGA MEIMBA
NISUNG NEM
VOTE AGÜJANG**

ABAM
YOUTH MINISTRY
CLEAN
ELECTION
Campaign



Dimapur, June 10, 2017: Hokolbarnü C-Edge College, Dimapur nung "Global Social Economic Trends" onük nung jembitsü atema jaokba- Dallas, Texas, USA nungi Social Entrepreneur, Benjamin Ng den Management Studies & Economics Department nungi kaketshirtem aser tesayurtem külemi tangokba noksa nung angur. Iba sentong nung jembidang Benjamin-i USA, Europe, China aser India linüktem indang rongsenkettsüng atishitepa jembidi aser kaketshirtem dang kanga meranga azüngtsü aser mapa meinyaki melii 'teka menena' tilateri mapa, aayangba mapa aser asentzü alua inyakba mapatem inyaktüsü ajungshia liasü. Iba lecture dak alia shisalemsatepba sentong ka agisema liasü, aser iba mapang nung kaketshirtem aser tesayurtemi onük dak sendakba nung metetdüba aika asüngdanga liasü.

UNC-i telok asem ken o jembitsü atema mapang telatet akhanger

Manipur, June 10 (Agencies): Manipur nung district tasen tentetba onük nung telok asem- Centre, state sorkar aser UNC yimtenren jenjang nung senden amentsü atema lateta ayuba mapang, anogo 10 dang anünga lia Hokolbarnü United Naga Council (UNC)-i, sorkar iba onük latettsü atema mapang ka lateta ayutsüla, ta metetdaksü.

Osangbener den jembidang UNC lenirtemi, "Iba onük atema

meinyakibo telok asem sendenji ayonga mekatettsü," ta ashi. UNC lenirtemisa, "Telok asem senden nung iba onük atema jembitsü memelungra onoki ozü litsü kümzüka ayutsü atema ajak inyaktüsü renema lir," ta ashi.

UNC-isa, "Onoki iba tensa junga mita atadar aser Naga nunger yirutsütsüsa inyakba mapabo onoki anema nokdaksü," ta metetdaksü.

May 19, 2017 nü Manipur

sorkar, Central sorkar aser UNC-i, ita ka tsüngda yimtenren jenjang nung telok asemi district tasen tentetba onük nung jembitsü melungtepa liasü, aser ita ka mapangji June 19, 2017 nü tembanger.

Ajisüaka tanü tashi telok asem senden amentsü atema anogo lemteta mali.

"Kechi südir süaka telok asem sendenji June 19 tashi nungbosa amentsüla," ta UNC lenirtemisa metetdaksü.

Manipur nung nisung 200 mapa nung shimba bushisüngdangtsü

Imphal, June 10 (Agencies): Taküm March ita nung Manipur nung assembly election agitsü mapang ana nung lia sorkar department 15 nung tim mesüi mapa nung nisung aika shimokba bushisüngdangtsü atema Manipur sorkari Special Investigation Teams pongu tentetogo.

Hokolbarnü Assembly Speaker, Y. Khemchand-i, Assembly Secretariat nung nisung 200 dak tema mapa nung shimokba bushisüngdangtsü atema Special Investigation Teams ana tentetogo, ta

metetdaksü. Paisa, "Imphal East Collector dang taoba speaker (Thokchom Lokeswar) kinüngtsü atema agütsüba OBC certificate reprangshitsü tuyuogo. La tebuji taoba mapang MLA ka liasü, anungji la nem OBC jenjang agütsüba nungji tashishitsü lir," ta ashi.

Chief Minister N. Biren Singh-i, BJP-i aniba sorkari mangyangtsü atema meinyaker, mesüra taoba sorkar, Congress ochimashi mebushir, ta ashi.

"Ajisüaka tim mesüi mapa

nung shimokbaji Election Commission-i metetogo. Mapa nung shimokba nungji ochimashi ali asü mali, ibaji SIT team temi bushisüngdangtsü," ta paisa ashi.

Osang ka ajanga ashiba agi, election sentong sangdonga model code benokba sülen mapa nung aika shimokogo. Election Commission-i department kar dangbo iba mapang nungji mapa nung tasenpur meshimoktsü tuyur liasü.

Iba bushisüngdangba sülen nisung noklang aika mapa nungi anentsütsüa akok.



Dimapur anasa Aoyimsen Baptist Arogo nung June 10, 2017 anogo nung Arogo Mission Board-i achaayanga yimten yimsürtem atema shisatokden sentong ka aliba sülen shisalen sayur Tir Yimyim yimozulur, Wb. K Temjen Jamir den külemi tangokba noksa ka angur. Iba shisatokden omen "Tanu lokti nung ochi yimsürtem" nung amendaker, yimsürtem ya ordinary nisung masü saka extraordinary nisung, ta tangatetba nung tangar dak alia pei lima aser nübortem meimtsü; pei lima asoshi timtem agia tenzütsü aser tangari akhümtsübuttsüsa peisasa pei takum aser jakla azüoka alitsü atema shisalemsatepba liasü. Iba dak sendakba nung Aoyimsen Baptist Arogo Pastor-i sangdong ka ajanga, iba sentong temoatsü ngua katetba atema Tir Yimyim yimozulur, K Temjen Jamir dang pelaba lemsatepba den külemi jentipur asoshi Tsüngremi tesayur taküm amshiang ta sarasademtsür, ta metetdaksü.

SE Asia atema NE ya Medical tiyongtsü ka akumtsü akok: Rijiju

Guwahati, June 10 (Agencies): Linük nung Northeast tesem ya South East Asia atema medical tiyongtsü ka akumtsü koka lir, ta tanü Union minister, Kiren Rijiju-i metetdaksü.

Tanü Guwahati nung Hindustan Prefab Ltd-i ambulance service tenzütsüba sentong nung jembidang Union Minister of State for Home Affairs, Rijiju-i, "Asen kidanger linüktem atema asenoki North East ya medical tiyongtsü ka kümduksütettsü koka lir. Myanmar nungeri medical treatment atema North East-i arur aser kar Dibrugarh (Assam)-i arur," ta ashi.

"Taküm August ita nung onoki Moreh Integrated Check Post (ICP) semzütsü," ta paisa metetdaksü.

"Guwahati aser Dibrugarh nung medical facility tajung kar lir, ajisüaka iba yimti ana dak alaka tanüngba North

East nungbo facility junga mali," ta pai ashi.

Iba tensa tajungba akumtsü atema sorkar mapatongtem nungdak, ta shia pai corporates dang NE tesem nung medical facilities lapoktsü atema ajungshi.

Rijiju-isa, medical facilities nung terenlok melira lokti nung terenlok alitsü makok, ta ashi.

"Asenoki ano aika inyaktüsü nungdak. Sorkari kijai yariba ajangabo mepiritsü. Alima nung tongtibang company aikati CSR dak sendakba nung mapa jenti inyaker. Ni item company tem, talisa Navratna company tem dang nungdakba nübortem yaritsü atema ajangshio," ta paisa ashi.

"Medical teyari ya asenok atema nungdak, ajisüaka infrastructure peria maliba ajanga takum aika samar. Asen yimtsüngtem nungi nübör aikati medical facilities magitetba atema ni nemjema bilemer," ta paisa shisem.

Dimapur nung SP mozü 7,920 den ganja seret 270 apu



Dimapur, June 10 (TYO): June 09, 2017 aonung 8:00 ako meta AIE, Tiameren leniba nung Excise Department, Narcotic Cell-i Dimapur nung Railway Colony nung aliba store-house ka nungi ganja seret 270 den Spasmo Proxyvon mozü süngjang 7,920 puogo, ta Honibarnü Superintendent of Excise (NC), Nagaland; Dimapur, S Phyoebemo Kikon-i

sangdong ka ajanga metetdaksü. Iba store house ji ganja shibelenertem atema tongti tesem rongnung ka lir ta bilemer.

Iba dak sendakba nung Cheto'er jabaso arishi küm 27, Ranjit Rai puogo aser NDPS Act 1985 kibok tapet ozüngtem nung ajemdaker ken o ka benoka judiciary nem agütsüogo, ta kasa sangdong nungsa shia lir.

Arunachal nung Aalo-Pasighat-Roing-Tezu transmission semzük

Itanagar/Pasighat, June 10 (Agencies): Tanü Arunachal Pradesh Chief Minister Pema Khandu-i state nübortem atema Aalo-Pasighat-Roing-Tezu 132-kv transmission systems semzütsüogo.

Deputy Chief Minister Chowna Mein aser Power Minister Tamiyo Taga nati iba project ya tamalen tenzütsüka liasü. State power department-i

Aalo nungi Pasighat tashi kilometer 77 transmission lines yanglu. Iba line ya Pasighat nungi Roing ajanga Tezu tashi kilometer 174 lir, aser ibaji Power Grid Corporation of India Limited (PGCIL)-i yanglua liasü.

Iba project nungsa 2x5 MVA, 132/33-kilovolt sub-station (Dura Korong) lir aser ibaji Power Minister-i semzütsüogo.



Guwahati (Assam), June 10, 2017: Honibarnü Guwahati nung Hindustan Prefab Limited indang Corporate Social Responsibility kübok ambulance agütsüba sentong nung Minister of State for Home Affairs, Kiren Rijiju-i jembiba noksa nung angur.

Nashi ozüng ajanga NE nung shinga timtem mangur: Rijiju

Guwahati, June 10 (Agencies): Centre sorkari nashi ayokba aser aliba nung tenokdangba ozüng benokba ajanga Northeast nung timtem ajurutsü, ta osang prokbaji tai, ta shia tanü Union Minister, Kiren Rijiju-i, iba tetuyuba ajanga northeast tesem nung shingaia timtem majurutsü, ta metetdaksü.

Congress den secular party tem aija pai osangbenertem dang, Assam, Arunachal Pradesh, Nagaland, Mizoram aser Manipur ama northeast state tem semdangang, aser iba tetuyuba ajanga kari dangi timtem ajurur asü majururur reprangdangang, ta metetdaksü.

"Iba ya tebilemtsü onük ka masü. North east tesem nung

timtem mali. Nisung ajaki pei chinüba achir. Rarated adoka mali mesüra nisung pua mali. Nisung shinga pua tepoukdaki yoka mali," ta Minister of State for Home Affairs, Rijiju-i Guwahati nung osangbenertem dang metetdaksü.

"Kecha onük maliba ka nung Congress-i ken o kümdaksür. Congress den secular telok kari nüngdak makaba nung onük kümdaksür. Nüburtemi parnok (Congress) sendokogo," ta paisa shisem.

Tribal state kar nung longkak aitba dak sendakba nung tasüngdangba ka langzüdang pai, ibaji yimtenren nung tajangzük angutsü atema inyaker, ta ashi.

Sorkar ozüng anema

Meghalaya nung BJP district unit tongti lenir anati party nungi anenba dak sendakba nung Rijiju-i, "Congress Party den kari iba ya onük ka kümdaksür. Nija kar party nung anenba ajanga onük ka mekümdaksütsüla," ta ashi.

"Congress-i dang longkak aiter. Nija kar party nungi anenba ajanga parnoki tiyazü nung onük ka kümdaksür," ta paisa ashi.

Union minister-isa, par sorkari iba linük ya terenlok linük ka kümdaksütsü, ta metetdaksü.

"Küm aika North East-i timtem ajurua aruogo. Onoki ibaji melenshitsü. Parnok (Congress den tangartem) tasa nung onok masongtsü," ta Rijiju-isa ashi.

Arunachal sorkari mapa inyaker nem DA shilem ana agütsütsü

Itanagar, June 10 (Agencies): Arunachal Pradesh Cabinet-i state sorkar mapa inyakerterem aser pensioner tem nem Dearness Allowances (DA) shilem 2 agütsütsü atema agizükogo.

Hokolbarnü Chief Minister Pema Khandu leniba nung cabinet senden ka mena taküm January 1 nungi DA agütsütsü atema lemteta liasü.

Cabinet-isa Chief Minister's Adarsh Gram Yojana 2017

agizükogo, aser iba scheme kübok constituency shia nungi yim kaka 'model village' shima terenlok agütsütsü.

Iba scheme kübok model village atema shimba yim shia nem sen crore 1.50 agütsütsü.

Iba scheme ji contractor nem magütsütsü saka yimdaklir ajak densema yimtsüng r o n g s e n k e t t s ü n g ajungkettsütsü. Model village temji local MLA aser DC-i akümba Committee kati

shimtsü. Ano külen post tasen yanglua iba mission ataloktsü atema state cabinet-i Arunachal Pradesh Police department nung post aika create süogo.


Item rongnung Fire & Emergency Services atema head constable driver 45, Deputy Superintendent of Police 32, Inspector civil police 80, inspector telecom 4 aser Inspector radio technician 3 densema lir.



Agartala, June 10, 2017: Honibarnü Agartala nung Governor House kima BJP pusemertem aser party nung inyakerterem Tripura nung sorkar mapa inyakerterem atema 7th Central Pay scale densema onük kar nung longkak aita takhangba agütsüba noksa nung angur.

Meghalaya police-i arishi küm 2 tanur Trisha kümzükogo

Khliehriat, June 10 (Agencies): June 4 nü Silchar nungi arishi küm 2 tain Trisha shiba tashiyim agi puer ao, la East Jaintia Hills kübok Khliehriat tesem nungi Honibar nikongtsütsü 4:00 ako shi nung nguogo.



SP EJM Spill Thamar-i ashiba agi, tanutsüla ya la puer aoertemi district headquarter nung Honibarnü anüngdang kou mejepba tesem ka nung toktsü. Tanutsüla ya ajep tenzükba sülen nüburtem shisabulua police nem metetdaksü.

"Tanutsüla yagi o kata mejembitet aser la ajep manener. La tang police-i anepaludar," ta Thamar-i ashi.

Trisha ya Subhadeep Roy Choudhury aser Satabisha Roy Choudhury na jala lir. Tenaprongla ya Assam university nung inyaker. La ya ghonda 80 shi samara liasü. Roy Choudhury aser kinungtsü na mapai aoba sülen kilirlai tanutsüla ya puer ao, ta temolung meleme bilemer.

Trisha ya Assam university campus nung lar kidang nungi June 5 nü 3:00 ako shi nung pua bener ao. Iba ken o nung temolung meleme bilemla Neha jena ogo aser tang tashi

monguteter.

"Onoki tanutsüla ya Sihar nungi tashiyim agi puer aola ta jangjaa liasü, kechiyong Silchar Police-i la rasaa ashiba den kanga mesükteper liasü," ta district police tekolakba-i ashi

Thamar-i Silchar police nem iba osang agütsüadokogo. "Tang tashi nung police tetsürtemi tanutsüla mesüzüktsü asoshi kanga merangdar saka parnok menora la Social welfare department nem agütsütsü," ta paisa ashi.

Iba maparen nung aibelena alirtem indang asüngdang dang Thamar-i ashiba agi, tanutsüla ya shishilembadak tesem ka nung toktsür parnok jena oadok. "Tashiyim agi tanutsüla puer aoertemi parnok pushitsü tsübur kechiyong police aser nüburtem ajaki iba osang angashiogo aser kümdangshia ataa liasü," ta paisa maneni ashi.



Guwahati (Assam), June 10, 2017: Bangladesh nung Hindu, Khristan aser Buddhist (minority tem) amakba anema Honibarnü Guwahati yimti nung Guwahati Chakma Students Union & Guwahati Chakma Society-i ayonga ozülü balala amer longkak aitba noksa nung angur.

ULFA den yimjung ken o jembidar

Guwahati, June 10 (Agencies): Union minister Kiren Rijiju-i Honibarnü ashiba agi, ULFA telungpur-i takhangbatem timba ka asadangtsü asoshi langa lir aser telemetba ka yakta agitetsü imlar.

"Arabinda Rajkhowa-i aniba ULFA telungpur den yimjung ken o jembitepba kanga junga odar aser telemetba ka dangi yakta arutsü imlar. Onoki parnok takhangbatem timba ka asadangtsü asoshi langa lir ta bilemer," ta Guwahati nung minister of state for home affairs-i osangbenertem dang ashi.

Pai osang tejangjabo memetdaksü saka ashiba agi, "Ni nenok dang ashitsüba ajunga

agi onoki parnok takhangbatem süoki ia asadangdar aser yakta telemetba ka dangi arutsü asoshi imlar." Mapang kobika tsüngda nung iba ya ataloktsü ta asüngdang dang pai ashiba agi, parnoki mapang telatet ka magütsütetsü.

ULFA pur tongtibangtiba takhangba, koba Assam nüjiso lir iba indang jembitepba ta Rijiju dang asüngdang dang pai ashiba agi, "Nüjiso indang ken o kecha mejembir. Iba indang jembira keno kecha jembitsü madoktsü. India temzüng ozüng kübok dang iba yimjung ken o jembidar."

"Ni India temzüng ozüng alema jembitsü asoshia kecha tashi mali," ta paisa ashi.



TIR YIMYIM

YIMOBILEM (EDITORIAL)

DIMAPUR SUNDAY, JUNE 11, 2017

TASHIMAITERTEM DEN

Alima nung tamangba yimsü kar nungbo tsüngrem nem bendanga agütsürtembo lokti nungi pilar azüngmeyakdak balaka nung alir, ajisüaka Khristan yimsü dak amangertem asoshibo yamaji masü. Khristan taküm ka lokti nungi pilaa alitsü makok, ibayongjiang arogo tenzük. Aji oda, Khristan yimsü yabo amangba purtem külemi telongjem ka nung amangtsüba yimsü ka lir. Iba jagi kodang aseni temenen menadir, iba jagi asen dak dang masü saka asenok adenba lokti dena kangshidaktsür. Iba kasaji kodang aseni Tsüngremi mulungba inyakdir, iba jagi asen dang masü saka asen kinunger, asen lokti aser asen arogo dena moatsür. Iba jagiang tenyar Peter-i Asia nung aliba Khristan purtem dangi züludang, "nenok teshimtetba kin, chuba putir telok temeshi kin," ta 1 Peter 2:9 nung shia angutsü. Tetezü asenok Yisu Khrista sülen anidaker asütsü asoshi shimtetba Khristan purtem ya kija kija balala alitsü asoshi shimtet masü saka telok küma Tsüngremi shimtetba kin ama alitsü asoshi shimtet ta asenok nem angatetdaksüner. Ibayongjiang, kodang Korint nung tiyazü tesayurtem adoka amangba purtem tamang nung metsüdakdaksür aser tanüla nung atsüngzüka oa tashimait akümer ta angashi, Paul ajemajema mena melitet aser pa mepelateti aküm. Idangjisa, Paul-i Korint nung alir amangba purtem dang asen temang nung tenüktelen koda yariteper, yamaji külem amangba pur ka peladang külemi pelatepang aser tejashi nunga külemi lemsatepang ta ajungshiba oren ka 1 Korint 12:26 nung shia angur. Asenoki aiben asenok külemi alir amangba purtem den tepela aser tejashi lemsatepsü mebiletmeti asena asen ali alir. Ajisüaka, ibaji Khristan taküm yimya dak maket. Khristan purtembo kati ka den yaritepa alir, iba jagi dang kati ka tamang nung tashi itdaksür. Atangji, aiben asenoka tamanger tajung ka ama amanga aodang asenok külem arogo purtem den melongjemteti asena asen kija aseni mulungba aser jangraba lenmang nung ooya alitsü akok. Idangji aiben asenoki külem arogo nungertem dak kechi ataloker aji memetetsü. Ashiko, külem amangba purtem kar tanüla nung atsüngzüka ooya alitsü akok mesüra pei taküm aser kibong nung timtem atalokya alitsü akok. Itemji asenoki metetsüla. Iba ama mapang nung asenoki tashimaitertem maitsüi mesüra tenüng meseni tonga orr parnok den tebilemstütemji lemsatepa yaritepsüla. Iba amaji asenok amangba purtem nem inyakdaksünüa tenyar Pauli Korint nung aliba amangba purtem dangi züluba lir. Aji oda, asen meketa aliba tesemtem nung külem Khristan purtem reshikangshiba asenoki memetetra aser aser metetyonga parnok timtem tekangshiji asenoki parnok den melemsateptetra asenok tamangba jengjangji ken jungjunga meyipa repringdangtsüba tia nung lir ta asenoki metetdi. Shitakba Yisu Khristai agütsüba temulungjang aser shisatsü adenba Khristan katibo külem amangba purtem pelatepdang mepelaiang malitsü aser parnok timtem reshikangshi aser shisabolu ajurudang tezü ka nung pei kija anisüngzüka melitettsü. Paul daka iba mulungjang liasü. Iba jagi pai ashi, "shiba tashi mait, nia tashi mait masü no? Kodang kar temenen nung tsükdir, idangji nia jashia akümer masü no?" 2 Korint 11:29. Tetezü, asenok amangba purtem ajak dak pei pei yari tashimait lir, anungji asenoki tangar dakang tashimait repringa maitsüi, tashimaitertem denji pei tashimait indang jembia tashi itshidaktsütsü indang ashir. Iba amaji, asenok tamangerbo tamanger ser nung asenok dak tangar den tepela aser tejashi melemsatepnüba shisatsü lira, Tsüngrem dang iba shisatsü melena tangar khuret lemsatepnüba shisatsü enokjang ta sarasademdi. Khristan taküm yabo ni dang junga lira ojang ta masü saka tangar asoshi aria bilemba taküm ka asütsüla. Iba jagi dang asenoki tangar dang Tsüngrem temeim indang shitettsü.

OLEMSABANG

'Kütsü Sarasadem' ken nung tai aliba medongshidi Correction of unaware, unforeseen, unrealized errors

- Tsüknung Penzü, Dimapur

(Taoba adok nungi...)

Ao : AOKK No. 345
Kütsü Sarasadem
BH. 95

1. Ni mamatetba anogo,
Kütsü meim olai ashir ;
"Tang nai toktsür kü temeim,
Kü sarasadem tamatok."

Leplazü :

Kodang ni la bilemteter,
La nela ni anasa lir ;
Kütsüi sarasademba,
Ola kadi bilemtettsür.

2. Mamatetba ola kadi
Kü mulungjang peladaksür ;
Ni len aia nemzüaka ;
La sarasadem ni mamar.

3. Kümtem süitema oaka,
La meim o mamateter ;
Tanga lai menden nung mener,
Sarasademba ni angur.

4. Ni kodanga mamateter,
Kü nela kümzüka mapang ;
La sarasadem langzüa,
Yisui kü nenen atok.

5. Iba ken nung onenlepten (commentary)

(a) Ken tenüng kensü nung tenloktettsüla :

Ken tenüngji iba ken kasa nung tesem ka nungbosa kensü (tune) nung tenloka alitsüla, tenloktettsüsa meyipzüksüla. Saka iba ken tenüng, 'Kütsü sarasadem' (My Mother's Prayer) ta asüba iba oren tesem kecha nunga tenloka mali. English text nungjibo tesem aisü nung iba oren kensü nung tenloka lir.

Ken tenüngji kensü nung tenloka alitsüla, tuneable asütsüla ; aser kensü nung tenloktettsüsa meyipzüksü tim ta gospel song translation advisory agi ashir. Iba translation advisory ya ozüng kaket, rule book mesüra church guideline amai kaket ka adoka maka. Saka ABAM Church Advisory Board ta asüba ama, nungdak mapang nung tapet mapa inyaktsü shisa lemsatepba inyakyim dang lir.

English source ken ajak nung ken tenüngji kensü nung tenloka aliba angutsü. Ao Osangtajung Ken Kaket (AOKK) nung-a alemli Impur nung American Missionary mapang adokba nungi 1990 adok tashi ken tem nung ken tenüng temji kensü nung tenlokteta meyipzüka liasüba angur. Ajisüaka AOKK 2002 revised edition adokba nungi tanü tashi amshiba nung ken tiembaka nung tenüngji kensü nung tenloka mali. (Tuneable title-ji koda meyipzüksü iba indangji ni yasür tanga ocet ka nung ashitsü. Yangibo meshili. Ya ken ka indang dang ocet tatsüka zulurba dang). Kü suggestion translation temalen agütsüba nungji kensü nung tenloktetba tenüng (tuneable title).

(b) Index talila inoktsü kü suggestion :

Tang amshiba AOKK nung index dabu 3 yamai lir :- (i) Topical Index, (ii) General Index (Ao), (iii) General Index (English). Pezübuba (iv) - ji ken mejemer aser kensü yanglur tenüng. Tenüng tarensen ana ya tang ken kolak nung space mesatempa agi zülujang onsara tila agi dang inokba angur. Index 4 buba inokra yangji zülujang tulu nung sadem sadema inoktetsü. Iba azüngteta yutsüba ken kolak space tazüng nungji English source book tenüng abbreviation aser ken no. ta alemli AOKK nung inokba amato inoktsü. Aor AOKK ken study sünertemi aser Ao nung tetezü mejangjaba kar lira itemji English ken reference bushitsü temela asütsü. AOKK nung tejangraba talila adoktsü. AOKK ken tem za English nungi meyipzüka asünungji ken shia nung source book abbreviation aser ken no. agütsütsü tim. Nisung ka ket nung source bookji aika masü, ka mesüra, tanga ka dang alitsü. Source book temji foreign publication kaket dang asünung, akokba tashi India nung ngutetba kaket tenüngbu ajak agütsütsüla (in abbreviation).

(c) Stanza 1 : "Remember child, your mother's prayer" - Common Gender

Iba ken nung tetsü kadi lar 'chir' dang ashiba, 'child' ta dang lir. Son, daughter, he, she ta kecha shia mali. Yangi 'child' ta dang ken mejemer-i ashibaji, japaso, jala, tebur, tetsür ajak dang ashir, ajak den kasasa apetba ken ta tamasa angateta yur, aiür, asangur, tebur, tetsür ajaki pei, pei tetsüi ashiba ama angatetdi.

(Maneni taruba adok nung...)

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

Longsa Baptist Arogo: Revival Mungjen

~ Longsa Baptist Arogo

(*Taoba adok nungi...*)

Iba tatalokba ya Kiphire area nung Revival metsü prokba mapa liasü. Iba sülen 1977 kum pastor Lumong aser Choir Master Takatsüba (Longsa) lenisüba nung Rev. Litsasi Missionary den nisung ana jaoka Bible Study sentong ka akatsü ayongzük. Saka Rev. Litsase Missionary ajanga nisung 26 anisemer aru. Kechiaser iba mapang Longsa nungi bener aruba revival Milak agi Tsare-Longkhim area sünger Tanela nung jangratepba mapang liasü. 1978 kum Phelungre arogo nung mezüngbuba Revival ka aka. Iba nung Tongti o jembir Tongpangshilu DIS (Longsa) aser Lima Aier ADC (Mopungchuket) liasü. Iba mapang nüburtem tanela nung temoatsü ngua revival indang tanang chiteta aküm aser shingaia nokdangtsü mokoki Revival milakji tuluba jangro.

Iba tatalokba ajanga Revival magizükba arogotem longjemer revival agizüker par Mungdang lenir aser pastortem mapa nungi anendakja aridok. Iba action committee Convenor ji pastor Lemdongzülu (Longsa) New Munger Baptist Arogo nungi liasü. Kodang iba osangji Longsa Arogo atong pastor Lemdongzülu den New Munger arogo tenzüker Longsai jaoka asüngdang "kechiba nenoki revival agizükertem aridoker?" Idangji parnoki ozü pastor dak tai kecha mali saka alimai nungloktsüba agi inyakba dang ta langzü. Anungji ozü pastor nenoki meyipa anir to ta mepishi. Idangji Longsa Arogoi ashi, nenoki mepishibaji onoki tashi anga agizüker. Aser onoki ner arogo nung revival agütsüi arutsü anungji nenokia tashi anga agizükang ta ashi. Longsa arogoi ashiba parnoki agizük nung 1978 kum par arogo dangi oa bible study agüja revival milak tsükloka doktsü. New Munger arogo ya revival anemer rongnungi mezüng revival agizüker arogo ka aküm.

Khaimungan arogo nung Revival metsü prokba: 1970 kum Sanglao aser 1973 Tsawao arogo nung pastor inyaktsü nübu yok aser item arogotem nung bible study agüja revival metsü prok.

Yimchung arogo nung Revival metsü prokba: 1970s nung Longsa arogoi item Yimchungrü arogo nung (Pongro Town, Zanger, Leankong, Sangkümti, Shiponger, Sangphur) pastor aser choir master yok aser Bible study agüja revival metsü prok.

Konyak arogo nung Revival metsü prokba: 1970s nung Longsa arogo ajanga Konyak arogo nung (Tamkong, Chalangshu, Yonghong) pastor, tesayula aser choir master yok aser bible study agüja revival metsü prok.

Phom arogo nung Revival metsü prokba: 1970s nung Longsa arogo ajanga Phom arogo nung (Ungphang, Yongshei, Tangha, Yachem) pastor aser choir master yok. Iba mapang Phom lima arogo kar nung Ao arogo ajanga revival osang proka liasü saka ano revival temai madoki lia Longsa arogo ajanga Ungphang, Yongshei, Tangha, Yachem, Longlen Town, Orangkong aser Hukpang item arogo ajak nung revival agüja Tanelar metsü prok.

Sema lima nung Revival metsü prokba: Sema kin dangi pastor meyokaka parnok dangi revival osang bener oa metsü prokba lir. Surohoto range arogo toku Surohoto Town arogo nung jatena revival katsü. Sema yim ka nung revival agütsüdang o meyiptsü asoshi yimsüsür Jongpongtemshi anir ao. Tsüngrem O meyipdang Tanela Temshii pa tama kongshia jepmeso aser pa ajanga nisung aika dak kongshia temoatsü ngua revival adok.

Longsa Arogo nungi Ao lima dangi Revival Milak aoba: 1967 kum Longsa arogo nung revival adokdang Mungdang lenirtemi anir Aoli arogotemi menüja, tiluja, ajumetsüa repring. Saka kodang Longsa Arogoi 1971 kum Kosangsanger putu yimsüsür aser arogo tenzükeri anir nütsüng nübu ajaki "Longsa lima missionary lima aser missionary arogo ka" akümtsü ta Tsüngrem dang azüngashia, Pastor Tsüknungbai mejemba ken; "Iba putu nungsa ozü lima ya missionary lima ka Nai kümdakjang" ta tena yimdong süa sandonga jaja. Iba kum November 18 nü Longsa Arogo Missionary Movement tenzüker. Aser iba fund atema sentep ka agia tenla bendenba Rs 14,807.20p liasü. Iba senji bendener Tsüngrem dang mission mapa inyaktsü kishi lapokjang ta sarasademba asangsang nung Pai atalokja, 1972 kum ABAM centennial amungba nungtem Tirap mission (Arunachal) lapoktsü aser iba nung Longsanüngsang (Merangkong) missionary yoktsü renem. Iba missionary ji Longsa revival nüktzü nungi tenlaba rongsen jagi yaritsü mulungtet aser 1974 kum March 31 nü ABAM ajanga pa Longsa Arogo nung commission süa yok. Aoli arogotemi iba tamang mapa aser süngjangji ngua Longsa Revival ji chichiba revival ta agizükter. Iba sülen nungi Aoli arogoi sayutsüngi aotsü kecha marendaki agizük aser ano Ao lima yimsüng balala nungi tanela nung tzurartem pei pei chitem bener telok telok Longsai arua Tanela nung taneptsu bushi, Tanelar mapatem aser tashi aintem indang asüngdanga amung. Iba mapang ji Longsa arogo aser yimti ya Tanelar chiyungtsü anetba arogo aser Tanelar lenmangtem asüngdang yimti arogo ka liasü. Longsa arogo nung jentipur taneptsü angu, Revival milak, Tanela sempet aser nüktzü arüzüka bener oa pei arogo nung revival tenzüker aser 1976 kum nungibo Ao lima arogo aika nung revival adoka merok mi ama pokloka Naga lima ajaklen prokshia ao.

(*Maneni taruba adok nungi...*)

Middle East Khristantem yaritsü indang bill ka agizük

Washington, June 10 (Agencies): Iraq aser Syria nung talidak makaba Khristantem yaritsü atema US indang House of Representatives nung bill ka agizükogo.

Rep. Chris Smith, (R-NJ) aser Anna Eshoo (D-CA) nati Iraq & Syria Genocide Emergency Relief and Accountability Act benok.

Iba bill ajanga Department of Defense aser U.S. Agency for International Development-i Islamic State ajanga timtem bener arutsüba ajanga talidak makaba Khristantem yariba teloktem nem teyari agütsütsü

lateta lir. Iraq aser Syria nung meimchir anema inyakba aser war crimes dak sendakba onüktem bushisüngdangba nung 'federal' teyari agütsütsü atema iba bill ajanga temeten agütsü.

Maneni iba bill ajanga attorney general aser secretary of state nati nisung lokti tepsetba dak sendakba onüktem asoshi criminal statutes meyipa repringshitsü tetuyuba agütsü.

In Defense of Christians telok ajanga ashiba agi, Iraq anüdoklentip tsütsü pei talidak toktsü aoba Khristantem parnok meyrjang aika U.S sorkar nungi teyari mangur.

U.S-i Iraq sorkar nem sen million aika teyari agüjaka, talidak makaba Khristantem meyarir, ta parnokisa ashi.

"U.S sorkar dena alimai Khristantem meyarira, parnoki Iraq toktsü aotsüsa akümtsü aser ibaji United States taginüba masü" ta IDC Executive Director, Philippe Nassif-i ashi.

"Iba bill ajanga U.S sorkari Khristan yariba teloktem den yariteptetsü" ta paisa shisem.

Iba tongtipang bill ya Senate dangi abentsü aser iba sülen US tir Donald Trump dangi sign asütsü atema abentsü anünga lir.

ANOGO ABEN TSÜNGREM DEN

NÜ MULUNG SÜANG

Ano Pai tanaben oagi sarasadema ashi, O Oba, ni ya majem tashi ni nungi ainshitsü mokokra, nü mulung süang. -Mathi 26:42

Teti tatem maka aser o bendangba indang jembidang, C.S.Lewisi ashi, "Tatem anogo nung idakji nübur telemsa ana dang alitsü: telok kati Tsüngrem dang ashitsü, 'Nü mulung süang' aser telok ka dang, tatem nung Tsüngremi ashitsü, 'Nü mulung süang.'

Tsüngremi mulungba nung asenoki mulungba asüngdangbaji teti tatem maka mapang. Tsüngremi asenok dang meimba nung, Pai tashiyim agi asenok dak meinyaker. Pai asenok dang meim aser pa temeim agizüktsü, magizüktsü asenok mulung. Pai kecha tenangzüktepba makai pa temeim agütsü, aser aji agizüktsü mesüra sentoktsü asenok mulung. Pai asenoki mulungba inyaktsü melar, saka iba nungi adokba teti tatem maka mapang asütsü.

Yisui pa tenyaba meteta liasü, Tsüngrem dang tashi angaba timtem tekangshi dena lir ta pai meteta liasü. Pa meimchir tsütsü nungi marok koba nung temenen ajak, tamajung ajak, aser meimchir tekangshi ajak dena lir, ibaji pa nungi agientsü mepishi. Pai Tebu nungi telangzüba mata. Pai tongmelang agi tashi its ashi, "Nü mulung süang." Iba jagi pai tebu koda ulua meim aji sayur. Iba olung yagi dang bendanga amangba tetezü pai asenok dang sayur. Asenoki Pa ket nung asen taküm agütsütsü akok. Yisui sarasademba ama: Nü mulung süang, O Tsüngrem.

Nai tanü Tsüngrem dang bendanga agüja amanger asü? Jenjangji tasak süaka na asoshi Pai mulungbaji tabensa ta nai mulunga agizüker asü?

Kü mulung masü, saka Nü mulung süang, O Tsüngrem.

India nung Yisu Khrista dang mojing ajaba atema Khristantemi ola adoker

Ahmedabadm, June 10 (Agencies): Class 9 Hindi oshi indang textbook tem nung Yisu Khrista mojing ta zülua aliba atema India kübok Ahmedabad nung Khristantemi ola adoker.

Gujarat State School Textbook Board-i textbooks nung Yisu tenüng jakdang aibelena 'hevaan' (moring) ta amshi aser ibaji metongshio, ta osang metetdaksü.

Ita ka tejakdang Khristantemi iba onük ya sorkar dangi aben saka parnoki mapa kechia meinyaki dang dang aru, ta osang tanga ka ajanga ashi.

"Moring Yisu indang olen kaji kodanga mamateter" ta textbook Chapter 16 nung zülua lir.

Gujarat nung Catholic Church atema otongdar, Fr. Vinayak Jhadav-i ashiba agi, taküm May ita GSSTB indang chairman-i iba aibelenji ashi.

"Textbook nung 'hevaan' ta ajenloka alibaji 'typing' aibelen asütsü anungji ibaji metongshiang ta onoki mepishia metetdaksü" ta Jhadav-i ashi.

"Textbook board nungi osang kecha manguba agi onoki Gujarat United Christian Forum dangi iba onük aben aser state education minister tsüngdang ken o ka benoktsü lemtet. Tamangba yimsü nung ajemdaker masü saka education indang jenjang nung ajemdaker iba aibelen ya metongshitsü atema onoki asüngdang" ta paisa metetdaksü.

Advocate Subramaniam Iyer-ia iba aibelen ajitet aser pai ashibha agi, tamangba yimsü tsütsü temulung meyrudaksütsü atema India nung ozüng lateta lir.

"Kaketshirtem dang Yisuji mojing ama sayur. Iba ya IPC nung arlla 295(a) kübok aiter, kechiyong iba ajanga tamangba yimsü tsütsü temulung yirutsür" ta paisa shisem.

Indian Christian Voice-ia sandong ka nung, iba onük ajanga Khristan aser Muslim nunger ajak temulung yirutsüogo, kechiyong Muslim nungeria Islam nung Yisu Khrista ya ainkar ka ama züngshir, ta metetdaksü.

"Alima ajunga nung Khristantemji yimjung meimertem ta züngshir aser Gujarat State School Textbook Board-i iba textbook renemba ajanga onok temulung yirutsüogo. Aibelenertem ozüng tapet agi merenshitsuila aser state sorkari tatok meshitsuila" ta ICV President, Abraham Mathai-i sangdong nung ashi.

Ashishitep onük adokba sülen Gujarat State School Textbook Board (GSSTB)-i textbook online version nungbo aibelenji metongshio.

GSSTB-i parnok indang website nung ashishitepba olungji agienogo aser GSSTB Executive President Nitin Pethani-i iba atema bushisüngdang ka asütsü ta nangzükogo.

OLONG PAITEP # 4447

	1		2				3			
4					5					6
			7							
8		9								
									10	
11							12			
13										

TIPILEN

- 1. Temeimtsü maket - (10)
- 4. Zü lanu - (4)
- 5. Chiyongsü den külemi achi- (6)
- 9. Watitepba sentong - (7)
- 11. Ki yanglutsü ali - (6)
- 12. Inyaktet - (4)
- 13. Kanga nüngdak - (10)

LANGTSÜNGLEN

- 1. Tzü memolo - (5)
- 2. Asaya - (3)
- 3. Tarutsü nükla / Nükjidong - (7)
- 5. Chi tejang ka - (7)
- 6. Mo dong bendener ayuba - (4)
- 7. Teinyaktsü lateta ayuba - (7)
- 8. Sen yong agütsü - (4)
- 10. Mi kaolok - (5)
- 12. Kou ayu - (3)

OLONG PAITEP # 4446 TELANGZÜBA

TIPILEN :

- 3. Nütsüng, 4. Tepela, 6. Tama,
- 8. Süjak, 11. Meti, 12. Nisung,
- 13. Temzüng.

LANGTSÜNGLEN :

- 1. Tsüngsem, 2. Kotak, 3. Neptzü,
- 5. Atok, 7. Anepdang, 8. Süin,
- 9. Aonung, 10. Angur.



KÜNEP YAKTA SOBANGBA O ALOKBA NA CLEAN ELECTION ATEMA ASHISHITEPER

- Sobangba** : Kabo, yasüngtobo nür kidang kanga longsoa angashiato.
- Alokba** : Oh ato na, sarasadem telok aja!
- Sobangba** : Iba sülen toaja, ano telok ka angashi nung koda.
- Alokba** : Achha itemto CYE pur nüngdak kar aruba ako.
- Sobangba** : Aya kabo, ana tsüngda kecha temiimshima, ni küla Independent candidate ba ola angashiajai.
- Alokba** : Ohhohoho, atona, ni taküma alu kobalen ajir ta arudangba aja.
- Sobangba** : Onsara melakzüi liang, nibo vote shia merijang pungungu ta nai shia angashiakodi, Clean Election atemabo nai chipang nunga nemsema tetshir saka vote bo tayokerato aji.
- Alokba** : Kabo na!!!! nia jungjunga asüngdangogo, pai ashibaji tayoker masü talira ta ashiaja!
- Sobangba** : Oh Alokba!!

Lilir : SMS

TANÜBO NAI LANGZÜANG

Q. India nung tawa Copyrights tongti ketdangser shiba shima lir ?

- [A] Hoshiar Singh
- [B] Pradeep Dubey
- [C] Nripendra Mishra
- [D] Omita Paul

(Taruba adok nung onoki langzüksü)

YASHI ADOK TELANGZÜBA : Vijaya Bank

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jela e-mail : tiryimim@gmail.com nung yokang mesüra Tir Yimiyim bureau tem nung agüjang.

Tepela Tasoba Anogo



- 1. Tenüng :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

NAIA YA METETER MA

2016 KÜM INDIA KÜBOK TATSÜKTIBA TESEM 10 JI YAMAI LIASÜ :

- * Rentachintala, Andhra Pradesh
- * Daltonganj, Jharkhand
- * Rajgarh, Rajasthan
- * Titilagarh, Odisha
- * Kurnool, Andhra Pradesh
- * Bhubaneswar, Odisha
- * Tirupati, Andhra Pradesh
- * Nagpur, Maharashtra
- * Sri Ganganagar, Rajasthan
- * Ahmedabad, Gujarat

June 09, 2017 anogo nunga India kübok tatsüktiba tesem 10 yamai liasü :

TESEM	STATE	MAXIMUM TEMP IN °C
Banda	Uttar Pradesh	42.2
Barmer	Rajasthan	41.6
Nowgong	Madhya Pradesh	41.2
Raipur	Chhattisgarh	41.2
Sheopur	Madhya Pradesh	41.0
Khajuraho	Madhya Pradesh	41.0
Brahmapuri	Maharashtra	41.0
Jaisalmer	Rajasthan	41.0
Nagpur	Maharashtra	40.8
Jhansi	Uttar Pradesh	40.6

SUDOKU # 3560

8			3	5	2			
1			9			8		
7	4				1			
7	4			1	3	2		
9				2	8		4	
6					5	9		
4	2					7	1	
3			5	2	7		6	
8			1					

TELANGZÜBA # 3559

4	7	8	9	2	8	3	1	5
1	3	2	4	5	8	8	7	9
8	5	9	1	3	7	8	2	4
7	8	1	5	8	3	4	9	2
9	4	3	8	1	2	5	8	7
8	2	5	7	4	9	1	8	3
4	9	4	3	8	1	7	5	8
5	8	8	2	7	4	9	3	1
3	1	7	8	9	5	2	4	8

OJANG LUTEP # 4055

- HISPELASHIA :
- ABAGÜTSÜJI :
- OATTEMSÜ :
- KASA :
- RIKA :
- NGNANUNGA :
- GÜTASÜRA :
- IIBBAJO :
- KDAJAKA :
- TAAYAI :

OJANG LUTEP TELANGZÜBA # 4054

ALIMA NUNG YAMAI DANG ATSÜK NUNGBO TASHIDAK AIKA POKTETSÜ SHISABULUR

Anü ita petinu ajanga alima nung tsüngsang mopung melenshidaktsüba ama nisunger tia-a melenshidaktsür ta anü ita petinu tetzürtemi ashir, parnok ashijaji shidak asü tai-ar nai-a na asoba anogo ita den tanü nü tia medemdangang (Horoscope) :



Aries
21/3-19/4

Mapa inyaksangshi nung nai aiben tashi agi koktettsü meranger. Saka mapa kar tashi agi masü saka tekolok amshia inyaktsü lir, aser aji tanü nai ajurutsü.



Taurus
20/4-20/5

Nai tongpang nung nokdakdang aiben junga meshisadangi inyaktsü meranger südi. Aser tanü nai iba kasa yimya amshira nü mapang aser tashi amajik nung indoker dang asütsü.



Gemini
21/5-20/6

Nai angashiba ken o ajunga nung marakzüi nokdaktsü memerangtsüla. Tanü nai sentong junga yanglura nü mapa nung takok angutsü maongka arutsü.



Cancer
21/6-7

Timtem mapang nai tangar dak temolung lema lira na takoksa ajurutsü. Anungji tanü nai tasü ita nokdakang aser medemertem dang teyari meshiang.



Leo
23/7-22/8

Ola tashi-i adokba nung nisung aikati tsübur saka tanüba iba densa marutsü. Nai bilemba ji dang shidak ta nai teblem aser tangar o angadangang.



Virgo
23/8-22/9

Tanü tangari nudang ashiba o tem ajunga angadangang, saka nai angashiba o ajunga nung tamang ka-a inyakra na lendongi ayitsü ana nung lir.



Libra
23/9-22/10

Tanü nai rarapangsen kar ajurutsü südi, saka nai item inyakyim nung shilem magi tajungba asütsü. Aser nü densa apir nü tetsüng meraloka oang.



Scorpio
23/10-21/11

Tanü nai maparen ajunga koktettsü, saka item maparen ajunga nung shilem agitsü temerang. Aser nai anguba aser angashiba ajunga tongtipang amai meblemetsüla.



Sagittarius
22/11-21/12

Tanü nai inyakra maparen nung takok ngunüra nü shisatsü aser yimya tajung amshiang. Aser nür medemertem dang iba yimya angazükdakjang.



Capricorn
22/12-19/1

Kanga tongtipang masüba maparen kar tanü nai jangja-jangja meteta alitsü nungdaktsü. Telemtetba tajung agitsü asoshi nü tangatetba nem anidakjang.



Aquarius
20/1-18/2

Tanü nai ken o tila ka nung tulu kümdaktsütsü südi. Nai bilemba aser nai angatetba ajunga ji shidak ta nai meblemetsüla, mesüra na takoksa ajurutsü südi.



Pisces
19/2-20/3

Tanü nisung aika rongrong-shirong tia nung nai ajurutsü südi. Anungji nü shisatsü tajungtiba amshiang aser parnok tsüngta-i ia angatetdakjang.

TEMANG ANEMALIBAREN

TANURTEM TEBOK Aoba (DIARRHEA) ANEPALUYIM



Tatsük mongpu aser tzünglu aruba mongpu nung arishi küm 5 ser tekübokpur tanurtem tebok aoba (diarrhea) tashidak kanga bulur, aser ibaji kanga junga anepalu mesüra taküma samar.

Iba wara agi atongba temaitsü rongnung- chi manangtsü, temang metatsü, tebok angotsü, saktünütsü, scü nung alok-metsü mesüra azü densema aotsü.

Diarrhea anepaluyim kar:

- 1) Iba tashidak nokdangtsü atema tzü mesüra tsükmenatsü juice agütsütsüla. Ner chirji mama teyongdak süra mama peria agütsütsüla. Tanang aketba chiyungtsü magütsütsüla.
- 2) Tanur nem chi, somomo, loaf amtsük (bread toast) aser apple sauce agütsütsüla. Item chiyungtsü agi parnok tebok meraksatsü. Ajisüaka tanur nem nashi mamatzü agi yangluba formula, nashi mamatzü products den naspati, apple, mokori, cherry aser plums indang juice magütsütsüla.
- 4) Somomo/mongo nung nungdakba nutrients aika lir, anungji iba süngjang ya tanur atema kanga tetemsü lir. Somomo nung zinc, iron, magnesium, calcium, vitamin C, vitamin B6, aser vitamin A lir. Ajisüaka mongoji junga mamen süra ibai ajanga tebok atangtsü, anungji magütsütsüla. Tebok aodang electrolyte indokbaji somomo achiba ajanga shilanga arutsü.
- 5) Süngmok aser alo (potato) ajanga tebok aser tar dak sendakba inyakyim nung yaritsü. Süngmok ajanga tebok aoba nokdangba nung yaritsü. Süngmok powder spoon ka ninang-mochitzü den meyokteper agütsütsü junger.

Alo kija metar chidaktsüba ajanga nutrients shia arutsü. Iba chiyungtsü ajangasa tebok angoba süngjemtsü.

Doctor dangi kodang anir aotsüla:

- * Tanü scü nung azü densema ora.
- * Aiben saaktsüra.
- * Chiyungtsü kecha achitsü mesüra ajemtsü memulungra .
- * Yimya khenyongi balaka melenshia tashi kanga meiti kümra.

(Source- Internet)

Q. Nagaland nung tzü mopong merükteta yunüba temaitsü ka sayua Deobar nü amangba purtem ajak tenla kidangi aodang gari mebeni tetsüng agi ao nunga koma süla?

Yamaji asü nungbo sentepi tarur malitsü ati. Pastorba o chowkidarba na kisüng asütsü aserbo tenata senteper malije oadoktsü. Deobar cancel.

-SMS

Asen lima yabo tangar lima city/town ama masüji tenlaki ana nung dang lirji Deobar nübo tetsüng agi ao nung tajung asütsü. Tzü mopung dang masü temang nunga taneptsu angutsü.

-SMS

Tzü mopong tajungba akümba dang masü yamala mesükba mapa kar ajanga shidakba Khristan taküm ka mesüka, tulu-tila takar-sensaker ajaki tila küma, Deobar anogo temeshi tenla kidangi arudang tetsüng agi arua Pa külem nung koda tajung süla.

-SMS

Tang shirnok tetsüng agi sentepi arudar panüji parnokji dang asütsü. Naga nunger asoshi asüküm, teyaksangji Tsüngrem dang nungi kanga agi tuluba.

-Mar Naharbari

Aoh nee!! Nagaland nung tangar kin indangji yutsür talisa asen Aor jajaba nung azümesen ya meja (ant) taküm ang süng memenepa nübo. Minute ter jajatsüba ang süng talisa Dimapur nung auto nungdang senzünüba azümesen tesa. Tangar kini sen ya Aor ket nungdang lir ta ashiba konang nungsang dang anganüba nübor nungdanga. Tenla kidang sünga mener Tsüngrem o angazüktsü, ibajidang merangtsü ayongzüker. Kanga pelar.

- Atila Jmr Padumpukhuri Dmr

Naga nungeri gari kanga sapur. Sentepi aobaji gari aser süoshi sayui aoer teimba lir. Tetsüngi sentep aoer malitsü südi.

-DW Jamir

100 nung 100 o aser mapa na puteptsü.

-tirymyim webmail

TAN HOPTA ATEMA - KOMA SÜLA ?

Q. Center sorkari nashi maleptsü ozüng latetba ya magienra, Nagaland India kübok malitsü ta Nagaland nung aliba lokti tentetemi ola adok nunga koma süla ?

Olong 20 shi nung June 16, 2017 tashi nung iba telangzüba ya onok dangi e-mail - tirymyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Deobarnü adoktsütsü.



Hokolbarnü Mumbai nung Jagga Jasoo film ken tanabuba 'Galti Se Mistake', sayaba mapang Bollywood actor Ranbir Kapoor, Katrina Kaif aser flim yanglur Anurag Basu nung tangokba noksa nung angur.

BSNL-i Wi-Fi Hotspots 25,000 amenoktsü

June 10, 2017 (Agencies): State meyong Bharat Sanchar Nigam Limited (BSNL)-i parnok indang rural exchange tem nung ita 6 tsungda nung Wi-Fi hotspots 25,000 amenoktsü asoshi hokolbarnü Universal Service Obligation Fund (USOF) den tezüngzüktepba ka yangluogo.

Iba tezüngzüktepba ya Communications Minister Manoj Sinha matsüngdang züngzüktepgo.

Wi-Fi hotspots 25,000 ya USO fund nungi sorakari teyari agüja amenoktsü. Iba project nung sen 940 crore indoktsü, ta BSNL-i metetdaksü.

"Iba sentong amener mezüing küm USOF-i noklang nung noklang OPEX support agutsütsü iba sülen tanabuba küm shilem 75 agütsütsü aser tasembuba küm BSNL nem shilem 50 bo achaayangtsü asoshi agütsütsü," ta kasa osang

ajanga metetdaksü.

"Iba project kübok mezüingbo rural exchange ajak nung Wi-Fi Access Point kaka amenoktsü," ta maneni shisem.

BSNL market share indang jembidang Minister-i ashiba agi, "Yaküm nungi BSNL market share shilem 0.30 agi timba kümogo. BSNL indang shilem 9.05 nungi 9.35 kümogo. Financial/economic tsütsü nungi asadanga nung iba küm taoba küm dang nungi timba asütsü."

Yimdak yimtsüngtem nung internet connectivity agütsütsü asoshi sorkar-i bendanga agüja inyakba minister-i lemsatop.

"Taoba anogo isheka nung yimya melenshiogo. Mezüingbuba quarter nungi tanabuba quarter tashi nung data amshiba shilem 60 agi timba kümogo aser tasembuba quarter nung tanabuba quarter dang nungi shilem 3.5 agi timba kümogo. Aji asünung iba project

ya tembanga inyaksü asoshi nungdaker aser iba ajanga yimdak yimtsüngtem digital tsütsü bendanga aliba samadaksütsü. Sorkari iba dak sendakba nung jenjang ka agiogo aser service agütsütsü asoshi Wi-Fi Hotspots 25,000 anemoktsü atema BSNL nem bendanga agütsüogo," ta Minster-i osangbenertem dang ashi.

BSNL CMD Anupam Shrivastava-i ashiba agi BSNL-i maparen inyak tenzükogo aser ita 6 nungi 8 tsungda nungbo iba project tembanga service agütsü.

"Optical fibres 93,000 shi mesangogo aser shilem mezüingbuba June 30 tashi nungbo renemtsü. Mezüingbuba shilem nung nükjidongji lakh ka lir aser iba sülen lakh 2.5 nükjidong yua alibaji 2018 december tashi nungbo tembangtsü," ta minister-i ashi.

Mccarthy-i Santa Claus kinungtsü Margie Claus shilem agitsü

Los Angeles, June 10 (Agencies): Taruba family musical Margie Claus nung shilem agitsü asoshi Actress Melissa McCarthy shimtetogo.

Iba film ya McCarthy kinungbo Ben Falcone-i direct asütsü. McCarthy atema 'musical' nung Margie Claus ama mezüingbuba shilem agitsü


aser iba film nung la Santa Claus kinungtsü Margie Claus shilem agitsü, ta osang ka ajanga metetdaksü.

Film direct asüba den külemi Falcone-i Damon Jones den Margie Claus script zülutsü. Maneni pai iba musical McCarthy den külemi tena indang 'On the Day banner' ajanga produce asütsü.

Iba musical nung Margie Claus-i tongti shilem agitsü. Film otsü nung la kinungbo Christmas sempet alem-i aodang sammmar kinungbo aser Christmas kümzüktsü asoshi la north pole mezüingbuba toktsür aoba otsü ka lir.

Margie Claus film ya 2019 November 15 nung sayatsü asoshi renema lir.

Bareilly Ki Barfi August 18 nü sayatsü



Mumbai, June 10 (Agencies): Ashwiny Iyer Tiwari-i Direct asüba taruba film 'Bareilly Ki Barfi' koba July 21 nü sayatsü

asoshi renemer liasü iba film August nungang sayatsü.

Iba film sayatsüba anogo August 18-i beneler tuogo, ta iba

film otongdar-i ashi.

Bareilly Ki Barfi film ya romantic comedy ka lir aser iba film ya north India nung Bareilly yimti nung tangok.

Film nung Kriti Sanon, Ayushmann Khurrana aser Rajkumar Rao nungeri tongti shilem agir aser Ashwiny kinungbo Nitesh Tiwari shibai nungtugu film Dangal direct süa liasü pai iba film otsü zülü.

"Iba film nung kü shilem ya asangurjanu mesükba shilem ka lir. La ya Bareilly nung alir saka la molungba dang inyaker," ta Bareilly Ki Barfi Kriti film nung la indang shilem indang jembidang Kriti-i osangbenertem dang ashi.

Siemens-i Karnataka nung Centres of Excellence 4 amenoktsü

June 10, 2017 (Agencies): Siemens Industry Software India Pvt Ltd-i Hokolbarnü Karnataka sorkar den state nung 'Centres of Excellence' 4 amenoktsü asoshi tezüngzüktepba ka yangluogo.

Iba tezüngzüktepba ya Government Tool Room and Training Centre (GTTC) den yanglu aser industry 4.0, automation, mechatronics aser internet of things (IoT) infrastructure tem dak rangloker 'world-class integrated skill development infrastructure' aser technical education curriculum tajung agütsütsü nükjidong nung iba tezüngzüktepba ya agi.

Iba centre 4 yagi automotive, industrial machinery, industrial automation, renewable energy and aerospace aser defence dak rangloker tesayubatam agütsütsü.

"India Industry tem-i automation aser digitalization atop asüba sülen tarutsü technology aser process balala atemaa tangazükba junga ngur aliba nisungtem nungdaksü. India economy nguittsü asoshi Siemens bendanga agüja yaritsü," ta Siemens Limited nung Managing Director and Chief Executive Officer Sunil Mathur-i ashi.

Item centre tem ya Siemens indang latest 'Product Lifecycle Management' software solutions; digital product design aser engineering atema 'NX' software, digital lifecycle

management atema 'Teamcenter' aser digital manufacturing atema 'Tecnomatix' amala amshia tesayuba balala agütsütsü.

"Iba ajanga kaketshirtem Industry balala nung inyaksü asoshi renemtsütsü aser industry indang inyakyim balala angazükdaksütsü," ta Siemens Industry Software India, Managing Director & Chief Executive Officer Suman Bose-i ashi.



Honibarnü New Delhi nung Little Miss Universe Internet-2017 Padmalaya Nanda Press Club of India nung osangbenertem den sensaksemba sentong ka nung tangokba noksa nung angur.

2021 tashi nung India nung internet amshir anasü agi timba akümstsü

June 10, 2017 (Agencies): 2021 tashi nungbo India nung internet amshir anaben agi timba akümstsü. Cisco Video-i maneni IP traffic aser internet traffic growth ajak amokbangtsü. 2021 tashi nung internet traffic shilem 76 parnok ket nung alitsü.

Digital transformation ajanga India nung 2016 nung internet amshir million 373 (nütsünyongsük shilem 28) alibaji 2021 tashinungbo million 829 (nütsünyongsük shilem 59) akümstsü, ta Cisco-i Hokolbarnü metetdaksü. Cisco indang "Visual Networking Index (VNI) Complete Forecast" ajanga ashiba agi, 2016 nung networked device billion 1.4 alibaji 2021 tashi nungbo India nung billion ana akümstsü.

"India nung Mobile network, device aser connection tem tajungba küma, generation network connectivity tajemba (2G) nungi 3G, 3.5G, aser 4G mesüra LTE ta renlokogo," ta Service Provider Business, Cisco India aser SAARC, Managing Director Sanjay

Kaul-i ashi.

2016 nungi 2021 tashi nungbo IP traffic pezüsü agi timba akümstsü imlar. Compound annual growth rate (CAGR) shilem 30 agi timba küma itashia data 6.5 Exabytes atongtsü koba 2016 nung ita shia 1.7 Exabytes lir, ta Cisco-i metetdaksü.

Kasa osang ajanga ashiba agi, machine-to-machine (M2M) connection shilem 22 asütsü aser 2021 tashi nung IP traffic nung shilem 5 asütsü.

IoT application tem smart meters, package tracking, digital health monitors amala device tem nung terenlok ajanga taruba küm 5 tsungda nung shilem 21 shi renloktsü.

Video-i maneni IP traffic amokbangtsü aser 2016 nung shilem 57 alibaji 2021 tashi nung internet traffic growth ajak senteper shilem 76 akümstsü. "India nung 2021 tashinungbo internet video minute ita shia billion 84 atongtsü mesera second shia 2000 vedio minute atongtsü," ta Cisco ajangasa maneni metetdaksü.



Srinagar (Jammu & Kashmir), June 10, 2017: Srinagar, Lal Chowk nung telungpurtem aliba osang ka lazükba sülen Honibarnü Special Operations Group (SOG) aser Central Reserve Police Force (CRPF) senteper Lal Chowk nung telungpurtem mita aoba noksa nung angur.

Tir Pranab-i 'Selfie With Daughter' App tenzüksüogo

New Delhi, June 09 (Agencies): Honibarnü Tir, Pranab Mukherjee-i 'Selfie with Daughter' app tenzüksüogo; iba ya mobile application ka lir aser iba app tenzükba nukjidong ya, tebok nung tanur tetsür bena lira raksaa intokba aser tetsür/tebur agitsü shimba onük anema nüburttem nem awareness agütsüsü atema lir.

Iba app tenzüksüba sentong nung Mukherjee-i nüburttem dang pei jalatem den noksa tangoker iba noksaji iba app nung upload sütsüba ajanga iba mapatong ya takok ngudaksüba

nung shilem agitsü ayongzük. "Tetsür bena lira raksaa intokba mesüra tebok nung tanur alidang tetsür mesüra tebur agitsü shimba anema 'Selfie with Daughter' ya alima ajaklen benshir," ta Tirisa ashi. Iba mapatong ya 2015 küm June ita nung Haryana, Jind district kübok Bibipur yim nung taoba mapang sarpanch, Sunil Jaglan-i tenzükba liasü.

Jaglan-i joko mapang talangka tetsürtem nem tashi agütsüsü aser yim terenlok atema inyaka arur.

Iba mapatong nukjidong ya

tetsür tsüraburtem nümadangdaksütsü aser tanur tesür/tebur ratio tajungba akümtsü atema lir.

Iba app ya asalentong tajung ka lir ta shia Tir, Mukherjee-i Jaglan-i Haryana nung iba mapatong inyakba atema pa nem tenüngsang agütsü.

'Selfie with Daughter' mapatong ya Ato kilonser, Narendra Modi-i benokba International movement ka lir, aser cricket asayar, Sachin Tendulkar-ia iba mapatong pusema social media ajanga ajungkettsüsü melungogo.

Madhya Pradesh CM-i lumai longkak ait tenzükogo

New Delhi, June 10 (Agencies): Madhya Pradesh nung aluyimertem longkak aitba mapang nung tanü Madhya Pradesh Chief Minister, Shivraj Singh Chouhan-i Dussehra Maidan nung lumia yimjung atema takhangba agüja mapang telatet ka makai longkak ait tenzükogo.

Ajisüaka opposition party, Congress-ibo iba ya "saya" ka dang lir, ta aitsü.

Aluyimer tentetemi alu nung parnoki züsentesüba chiyungtsü/aonsotsütem nung jenjang tajungba agütsüsü aser parnoki sen apua aliba atoktsü densema takhangba balala agütsüdar.

Tanü 11:00 ako meta

Chouhan-i Bharat Heavy Electricals Limited indang Dussehra Maiden nung mener longkak ait tenzük.

State Congress tongti otongdar, K K Mishra-i, Chouhan-i nüburttem dang, pai lumibaji saya ka asü, sentong ka asü mesüra state nung lendong adokdaksüba atema tatok meshir?, ibaji metetdaksütsüla, ta ashi.

"Pai Gandhi yimya benshir, ajisüaka yamaji masü. Pai Gandhi kürakyanglu tsüngdang mamen, mesüra pai iba saya metenzükdang kürakyanglu nem narozük mazüktsü," ta Mishra-i ashi.

"Küm shia Dussehra Maidan

nung Ravana rongdoker ta pai metettsüla," ta paisa ashi.

Tawa Mandasaur district nung aluyimertem longkak aidang police-i injang khaloktsüba ajanga aluyimer pongu asüba sülen anüdoklen Madhya Pradesh nunga aluyimertem longkak aitba prokshi, aser iba atema state sorkar aitsüba mapang ka nung Chief Minister-i yimjung atema takhangba agüja lumia longkak ait tenzükogo.

Yashi Chauhan-i, "Ni Mantralaya (secretariat) nung aliba kü office nung mamentsü, saka Dussehra Maidan nung mener yang nungjagi mapa ajak inyaksü," ta metetdakja liasü.

7th Pay Commission: Central sorkar mapa inyakerkem July nungi revised allowance angutsü

New Delhi, June 10 (Agencies): 7th Pay Commission-i benokba ama, taruba ita nungi tenzük Central sorkar mapa inyakerkem allowance timba angutsü, ta osang ka ajanga metetdaksü.

Kasa osang ajanga ashiba agi, July ita nungi tenzük sorkari house rent (HRA) densema revised allowances agütsüsü.

Tan hopta Union Cabinet senden ka mena 7th Pay Commission report nung ajemdaker HRA aser higher allowances indang o lemteptsü, ta osang angazüker.

Taoba Hokolbarnü Empowered Committee of Secretaries (E-CoS)-i parnok indang allowance report Cabinet nem agütsüogo.

E-CoS-i AK Mathur Panel report nungita, House Rent Allowance (HRA) shilemji

Class X, Y aser Z yimtitem indang basic pay shilem 24, 16 aser 8 asütsü agizük.

Iba denji kasa HRA rate ji DA shilem 50 den timba süra shilem 27, 18 aser 9 revise asütsü aser DA shilem 100 den timba süra shilem 30, 20 aser shilem 10 revise asütsü.

Tang Class X, Y aser Z yimtitem/jilattem atema HRA rate ji Basic pay shilem 30, 20 aser 10 shilem lir.

Taküm April ita nung Union Cabinet-i 7th CPC (Central Pay Commission) recommendations-i pay aser pension benefits dak sendakba nung benokbatem agizük.

Linük nung Central sorkar mapa inyaker nisung lakh 47 shi lir.

CPC-i pay aser pension nung benokbatemji Cabinet-i agizüka inyakdar saka allowances bo akhi ama kasa dang agütsüdar.



June 10, 2017 nü New Delhi nung aliba College of Nursing, Army Hospital (R&R) nung 58buba batch Probationer Nurse tem commission asuba mapang tangokba noksa nung angur.

November ita matongdangsa Ram Temple atema bill ka benoktsüla: VHP

New Delhi, June 10 (Agencies): Tanü Vishwa Hindu Parishad (VHP)-i Centre nung BJP-i aniba sorkar dang, Ayodhya nung Ram tekülem ki yanglutsü atema taküm November ita matongdangsa bill ka benokang, ajimesüra VHP-i November ita nung tongtumbang teletmetba kar agitsü, ta metetdaksüogo.

VHP International Joint General Secretary, Surendra

Jain-i, "BJP-i aniba sorkari Ram tekülem ki yanglutsü atema November ita tashi nungbo Parliament nung bill ka benoktsüla. Aji meinyakra Dharam Sansad nung tongti putirtemi tongtumbang teletmetba kar agia sangdongtsü," ta metetdaksü.

VHP-i ayonga taküm November 23 nungi 26 nü tashi Karnataka nung Dharma Sansad ayonga akatsü.

Maharashtra nung tzunglu ajanga nisung 12 asü

Mumbai, June 10 (Agencies): Honibarnü Maharashtra nung Mumbai densema tesem aika nung tzunglu sashia aruba ajanga tajemba agi nisung 12 süogo, aser maneni taruba ghonda 48 tzunglu maneni arutsü ta weather department ajanga metetdaksüogo.

Tanep züngia 1:00 ako nungi tenzük sawatsü mapang tashi Konkan, Mumbai, northern, western aser eastern Maharashtra nung tzunglu sashia aruba den külemi tsüngmok

amokba den tsüngpret yaa liasü. Yimti kar nungbo ali nemzük alidak aika nung tzi metsünga liasü.

Iba tzunglu ajanga tajemba agi state nung nisung 12 süogo. Asürtem rongnung Gadchiroli nung nisung pezü asü aser nisung ti yiru, Nanded nung nisung asem asü aser aser nisung ka Nashik nung tsüngi agi aiset.

IMD Mumbai-i Konkan belt, north & south central Maharashtra aser Marathwada nung ano tzunglu sashia arutsü, ta sangdongogo.



New Delhi, June 10, 2017: Saharanpur nung tatalokba anema Honibarnü New Delhi nung aliba Uttar Pradesh Bhavan nung All India Students Association (AISA) züngsemtemi Uttar Pradesh sorkar anema longkak aitba noksa nung angur.



June 10, 2017 nü Afghanistan kübok Kunduz province nung Afghan security force sepaitemi telungpurtem anema mapa inyakdang agiba noksa ka angur. tesüiba ghonda 24 tsungda Afghan security forces-i telungpu 23 tashi khasetogo ta Interior Ministry-i tanü metetdaksü.

Iran sülen Islamic State-i Saudi Arabia amokmerener

Dubai, June 10 (Agencies): Iran yimtiba Tehran nung nisung 17 tepsetba atema tenüing agiba sülen Islamic State (IS)-i Saudi Arabia amaktsü ta amokmerena metetdaksüogo, ta Site Intelligence monitoring group-i ashi.

Bodbarñü Tehran nung suicide bomber aser prangpong amertemi Iranian parliament aser Ayatollah Khomeini indang mausoleum amak. Iba lendong nung nisung aika yirua lir.

Shi'ite pur teimba sür aliba Iran nung IS-i maneni amaktsü ta amokmerenogo.

Tehran mamakdang yangluba asütsü akok ta bilemba video ka nung, kiralongrar pungu tejak meimbanger Iran nung Shi'ite nung amokmerena lir aser iba video nungsa Saudi Arabia sorkar dang parnok mapanga arutsü ta shia lir.

"Allah-i mulungra, iba

brigade ya Iran nung mezüngbuba jihad asütsü aser onoki Muslim nung dang onok sülen anidaktsü ayongzüker. Allah-i mulungra, mi jangrua alibaji meseptetsü" ta tejak meibanger aliba nisung kati video nung shia lir.

Video tatemlen paisa Saudi Arabia sorkar dang, "Iran sülen, nür mapang-a arutsü. Allah ajanga onoki nü kiojenten amaktsü. Onok shinga indang agent masü. Onoki 'Allah aser His Messenger' akhümtsübur aser tamangba yimsü atema rarar. Iran mesüra Arabian Peninsula atema masü saka tamangba yimsü atema rarar" ta shia lir.

Islamic State(IS)-i Syria aser Iraq nung tesem aika makdoka agia lir aser parnoki taoba mapanga Saudi security forces den Shi'ite nung makogo.

Iran ketdangsertemi ashiba agi, amakertem rongnung par pungubo Iran nung senso liasü aser parnokji IS-i aniokba liasü.

Külen, Iran nung tashitait Revolutionary Guards Corps-ibo amakbaji Saudi Arabia dak tai tongloktsüogo aser mang ayangtsü ta metetdaksü. Ajisüiaka, Sunni nung teimba aliba Saudi Arabia-ibo parnok shilem kecha mali ta ashir.

Saudi Arabia, Egypt, United Arab Emirates aser Bahrain linüktemi Qatar den tesentaktep pilaba sülen tang Middle East nung tensa mejungi küma lir.

Qatar-i kiralongraba pusema yarir ta linük pezüi tai tongloktsür saka Qatar-i ibaji magizüker.

Hokolbarñü Saudi Arabia nung U.S. embassy-i U.S. sensotem dang security notice ka agütsüogo.

Russia-i Qatar onük atema yariteptsü mulunga lir

Moscow, June 10 (Agencies): Qatar aser Gulf nung par kidanger linüktem tsungda angatetteptsü atema olemtep alitsüla aser iba nung par linükia yariteptsü, ta Russia foreign minister-i Qatar dang ashi.

"Onoki iba tensa atema kanga tebilemtsü abener" ta Moscow nung Sergei Lavrov-i Qatar Foreign Minister Sheikh Mohammed bin Abdulrahman Al-Thani dang ashi.

"Onok den yaritepba linüktem tsungda yamai tensa mejungi akümba atema onok mepelar. Onoki olemtep ajanga angatettepdaktsünür" ta Sergei-isa mepishia ashi.

Kidanger Arab linüktem den tesentaktep mejungi akümba sülen Qatar-i tangar dang nungi teyari meshir.

Qatar-i Muslim Brotherhood movement aser Al-Jazeera network yarir ta aija linük pezütsungda angatetteptsü atema Bahrain, Egypt, Saudi Arabia aser United Arab Emirates-i tesentaktep pila.

Russia-i akokba tashi yariteptsü aser iba tensa süngjemdaktsütsü atema mulunga lir. Kiralongraba anema raratsü atema telongjem nüngdaker, ta Russian Foreign Minister-isa ashi.

Qatar-i parnok aitsüba onüktem magizüker aser Al-Thani-i ashiba agi, par linük anema tenokdangba agütsübaji ozüing alema inyakba mapa ka lir.

Iba onük ya Russian hackers ajanga adokdaktsütsü ta osang kar ajanga ashir saka Russia-i ibaji tiyazü aser kuli kecha mali ta ashir.



June 10, 2017 nü Kazakhstan yimtiba Astana nung Spain Chuba King Felipe (achiji) aser Kazakhstan Tir Nursultan Nazarbayev nati honour guards sema aodang agiba noksa angur.

Myanmar navy-i tasü mangtem ngutetogo

Naypyidaw, June 10 (Agencies): Taoba Bodbarñü Myanmar anüdoklentip tsütsü mitkar tayimtsü ka tsükokba sülen bushitepa arudang Myanmar navy rongtemi tasü mang aika ngutetogo.

Navy indang rongtemi Andaman sea nung yipru ajangdanga tayimtsü tsükokba bushiyonga arur aser parnoki tanü mang ka ngusemogo.

China-i yangluba Shaanxi Y8 tayimtsü nung nisung 122 mena liasü. Parnok rongnung tanur den sepaitem indang kinungertem dena liasü.

Tanep navy indang rong kati tzüyim nung tasü mang ka ngutetogo aser ibaji züngsem

tang tashi nung mang 33 ngutetogo, ta osang ka ajanga metetdaksü.

Myanmar-i tayimtsü bushiba maparen nung China-ia yariteptsü mulunga lir ta tanü osang ka ajanga metetdaksü.

China ya kidanger tajung ka lir aser Myanmar'er tejashi lemsateper, ta China tir Xi Jinping-i Myanmar tir U Htin Kyaw dangi shidi ka nung lemsatep.

"Xi-i tasürtem atema mang ayimba aser Myanmar sorkar o nübortem den tejashi lemsateper ta shidi nungsa shia liasü" ta osang ajanga metetdaksü.

US special forces-i Philippines sepaitem yarir



Philippines kübok Marawi yimti nung Philippine Air Force tayimtsütemi Muslim telungpurtem aliba tesemtem amakdang agiba noksa ka angur.

Washington, June 10 (Agencies): Philippines sepaitemi Marawi yimti IS den tesentaktep aliba telungpurtem ket nungi meyipa agitsü merangba nung US special forces-i yariteper, ta army-i Honibarnü metetdaksü.

US special forces-i army den yariteper, ta Lt. Col. Jo-ar-Herrera-i osangbener senden ka nung ashi.

"Parnoki raraba nungbo shilem magir, saka technical support agütsür" ta paisa ashi.

Tesüiba mapang Philippines tir Rodrigo Duterte-i US sepaitem par linük nungi meindoktsü ta jembia aru.

May 23, 2017 nungi sepaitemi Marawi yimti nung telungpurtem longpanga lir. Sepaitemi parnok den tesüsaba khatapba nung Philippines marines 13 tashi taküm sama, ta osang ka ajanga metetdaksü.

Islamic State wako amer telungpur noklang aika iba yimti nungi jena mouteti lir. Parnokji

Philippines nung IS emir, Isnilon Hapilon aser Maute adianu Omar o Abdullah nung lenisüba kübok lir.

Iba rara nung sepaitemi 58, kiralongrar 138 aser civilian 21 tashi taküm samaogo. Tang tashi nung sepaitemi yimti nung shilem 90 shi telungpur ket nungi meyipa agiogo.

Rara tenzükbaba anogo tir Duterte-i Mindanao tesem ajungalen 'martial law' alitsü tetuyuba agüja liasü.

London amakertemi truck gari amshitsü merang: Police

London, June 10 (Agencies): London Bridge amakertemi truck gari ka amshitsü tasa atong saka ibaji matalok, ta Honibarnü police-i metetdaksü.

Nisung asem jagi payment details magütsütetba ajanga truck gariji hire mesütet aser iba jagi parnoki gari tilaka amshia kiralongra mapa inyak, ta osang ajanga ashi.

June 3, 2017 aonung par aseme London Bridge nung

nisungtem dak atsükba sülen Borough Market nung alirtem dak kotari agi tsünyonga ao. Iba lendong nung nisung 8 asü.

Police-isa ashiba agi, nisungtem ket nung 30cm pink ceramic kotaritem aser van gari nung petrol bomb tem bena liasü.

Kiralongrartemji Khuram Shazad Butt, Rachid Redouane aser Youssef Zaghba ta jangjaogo. Parnok ajak ya sepaitemi khaset.



June 10, 2017 nü Guwahati nung Minister of State for Home Affairs, Kiren Rijiju-i Hindustan Prefab Limited indang Corporate Social Responsibility kübok ambulance ka apusodaktsüdang agiba noksa angur.

Nagaland CM-i anir telok aser...

(Tapak 1 nungi)

NNC-FGN-ia sangdong ka nung NSCN/GPRN Chairman, SS Khaplang asüba atema asükhu lemsatepba metetdaksü. "Na asen nisung atema Tsüngremi agütsüba sempet ka liasü. Nai kanga meranga inyakogo aser onok ajungmesogo. Asenok külem alizüing matongdang, na Tsüngremi anir ogo aser iba atema onok temulung raksar, saka onok taküm alirtemi, tarutsü asen Naga lima atema maneni alizüing matong tashi inyaksü aser nübertem tsüingda tenangzükba agiba nungi

masetshitsü" ta Tir, Gen. (Retd) Thinoselie M. Keyho aser Kedahge, Brig. (Retd) S. Singnya nati sangdong nung shia lir. Maneni, NSCN-ia sangdong ka nung asür SS. Khaplang'er kibong den asükhu lemsar, ta metetdaksü. "Onok taoba Chairman asür Isak Chishi Swu-i tatok agütsütsü aser putephitsü sangdongba nung ajemdaker, onoki asen Kümtetdakba Yisu Khrista tenüing nung, SS. Khaplang-i yimtenren tsütsü aibelenba aser ozüing alema inyakba mapatem ajak atema

tatok agütsüogo." ta NSCN lennir Th. Muivah-isa sangdong nung shia lir. Tsüngremi tasür kibong nem tesünep aser tashi agüjang ta onoki sarasademtsür aser lennir tanüla nem teti anisüingzük ngudakjang ta NSCN-i sarasademer, ta Th. Muivah-isa shisem. Maneni Nagaland Tribes Council (NTC), NPCC Tir K. Therie aser MP Neiphu Rio nungertemia sangdong balala nung SS Khaplang ajungbena asüba atema temulung raksaba den asükhu lemsatepba osangtem metetdaksüogo.

MKR Pillai indang osang nung...

(Tapak 1 nungi)

Nagaland state ya nisung tamajung aser mashimemeteteremi ketdangsur ama ajiteter, kechiyong parnoki non-local tem teyari medeni mapa kecha meinyakteter. Tinku, Dinnath aser Pillai nung amala ochimashi Non-Local temi Naga nung ajungtsü atema kecha mebilemstür saka ozüing alema mapa tapu balala inyakba ajanga senotsü ajak auyazüker, ta Media Cell sangdong nung shia lir. IT ketdangsertemi iba osang yimjak nung metetdaksüba ya I-T Nagaland aser State Vigilance Commission (SVC) saksalemtsü mapang ka lir. Küm paika ya I-T Nagaland-i kechisa

inyaka aru ta nisungtemi süngmangseta bilemer. Tanga state tem nungbo SVC aser I-T department temji ajaki tsübuba teloktem lir, saka Nagaland nungbo parnokji tema tazütsü atema tentetba teloktem amai dang lir, ta parnokisa ashi. Income Tax (I-T) Nagaland-i Income Tax exemption certificate agütsüba dang masü saka I-T ajanga bushisüingdang asüba ajak nung yaritepsüla. Ajidang masü, Income Tax (I-T) Nagaland-ia senotsü tim mesüi amshiba dak sendakba maparen, pei sasa bushisüingdangtsüla. Maneni SVC-ia MKR Pillai-i Nagaland

nung consultant ka ama inyakba mapang aser Nagaland nung pa indang proxy business dak sendakba onüktem bushisüingdang asütsüla, ta ACAUT-isa ayongzük. Nagaland nung nübertemi ochimashi mapa inyakbaji kecha balaka masü ama dang bilemer, kechiyong yimjak nung tuteta sayuaka aser metetdakjaka, nisungtemi kecha mashir aser odang toktsür. Ajisüaka, asenok Naga nungertem saksalemtsüla aser temenen talenba nungi salar, asen jenjang tajung aser akhüm tanaben lepa bener arutsü atema merangtsüla, ta ACAUT Nagaland-isa mepishia metetdaksü.

AKM-i Imtiyapang aser Shilukaba...

(Tapak 1 nungi)

"Naga nungeri Ao kin nungi kanga imlar, anungji, maparen ajak nung sadanga/lemdanga masü saka Naga nung telungjem asoshi ochi shia, nendaka aser meranga inyaksüla", ta paisa ajungshia liasü. NSF ya AKM-i shilem tulu agia tenzük asünung, yangi Ao

kin khuret tulu lir ta bilema inyaksü asoshi paisa ayongzük. NSF nung inyaksü shimer Imtiyapang aser Shilukaba na asoshi Mokokchung Town Baptist Arogo (MTBA) Assoc. Pastor Wb. Temsüwati Kichui Laishiba tekong kar zünga temoatsü meshia sarasademtsü.

Iba sentong nung AKM tenzükertem den Ao Senden, Watsü Mungdang aser Mokokchung Town Lanur Telungjem (MTLT) nungia tenzükertem arua aden. Sentong nung Imtiyapang aser Shilukaba natia shilem agia tepela o lemsatepa liasü.



June 10, 2017 nü Zogazou Tsiesema Basa nung Angami Students' Union (ASU) nung menden pur tejen aser tasen melentepba sentong ka agia liasü. Iba mapang ASU nung lenir taintem, NSF tir, tzükong shia nungi tir, Angami Youth Organisation nung lenirtem den teyaritepertem dena liasü. Tang ASU nung 2019 küm tashi inyaksü atema Visako Rino tir shima lir.

TEMEIM OBALA BILEMTETTER



Lt. Imtimeren Lemtur

Nai onok toktsür tanü June 11, 2017 nü küm ka ajunger. Ajisüaka, nü den pelatepa aliba anogotem, nü temeim mapatem aser nü sarasadem onok mulungjang nung teti lir. Onoki na meimer aser kanga menungrar. - *Temeim chirnur, anükapang aser kinungertem.*

AKHOYA SENSO TELONGJEM MOKOKCHUNG. TEPELA LEMSATEPER

Akhoya senso Wb. Arentemjen Jamir, Ao Senden nung Repsem zülur asütsü shimba atema Akhoya Senso Telongjem Mokokchung-i Aortem dang kanga pelaba metetdaksür. Iba den külümi, shiba shimtetogo, paia Aor mulung süa tenzüktsü ajungshir.

Sd/-
Imli Imsong,
General Secretary, ASTM.

ELITE HEALTHCARE TRAINING INSTITUTE

Dimapur - 797112, Nagaland
ADMISSION GOING ON

Courses offered	Eligibility	Duration
FHW (Female Health Worker) ANM	10 th Passed	2 Years
DHAI/Nursing Assistant	8 th Passed	1Year

CENTRE-I	CENTRE-II
Dhobinallah Culvert, Near ICICI Bank.	4th Mile Near Agri Expo Junction
M.No: 9856125245/ 9615694009	M.No: 8974507931/ 9862639134

(Hostel facility available)

TENDER NOTICE NO.: MEDICAL -03 OF 2017 DATE : 08-06-2017

Item mapa asoshi sealed covers nung open tenders meshir :
Mapa tenüing : Contract mapa agütsüba anogo nungi tenzükü küm 03 asoshi Dimapur Railway area nungi " janaona endoktsü". Tender Value : 61,03,500/-; Earnest Money: 1,22,100/-; Cost of Tender Document : 5,000/- (500/- extra by post);
Iba Tender forms ya Chief Medical Supdt./N.F.Railway/Lumding nungi mapa inyakba anogo 20-06-2017 nungi 19-07-2017 tashi nung ghonda 12 tsüingda cash agütsür angutsü.
Iba Tender ya Chief Medical Supdt./ N.F.Railway/Lumding and Sr. DMO/ DMV office-tem nung 19-07-2017 anogo 13:00 ako tashi nung agizüktsü aser 20-07-2017 anogo 16.00 ako nung CMS/LMG office nung lapoktsü . Lenmand nung samaba mesüra menuba atema Railway-i kecha khuret mabentsü.
Tender agütsüba mesüra lapokba anogoji Bandh / sodi anogo tenjira iba sülen mapa inyakba anogo mezüingnü agüja aliba kasa mapang nung agütsütsü/ lapoktsü.
Koba kuli agi südsüaka iba tender agütsüba maparen nung menuba/ timtem ajuruba/ magizüktsüba aoshi Railway administration khuret masütsü.
Railway administration dak kecha kuli magütsü tender kar mesüra ajak magizüktsü tashi alitsü.
Tender Notice tejanga aser Tender Documents ajak iba websire nung angutsü
www.nfr.indianrailways.gov.in.
Chief Medical Supdt. Lumding

E-Tender Notice No. RN-ST-06-2017-18 Date : 07-06-2017

Item mapatem asoshi Divisional Railway Manager (S&T), Rangiya-i contractor mapa takok aser inyakdanga alirtem nungi E-Tender ajanga prescribed tender documents nung open tender meshir :
Tender No.: RN-ST-06-2017-18;
Mapa tenüing : Up gradation of 29 nos. data loggers to suit RDSO specification of IRS.S-9912006 in Rangiya Division Tender Value: C47,85,0001-; Earnest Money: 795,700; Cost of Tender Forms: 73,000.00; Mapa renemtsüba mapang tatakzük : 120 days, Validity offer: 90 days
Etender shibangba anogo aser mapang : 15:30 hrs. on 17-07-2017.
Etender lapokba anogo aser mapang : 15:30 hrs. on 18-07-2017 at Sr. DSTEIRNY's office.
Earnest money Deposit and Cost of tender document:
Iba tender atema tender document jenjang aser Earnest money agütsüba ON IREPS portal nung net banking, credit card etc. ajanga dang agütsütsü. Demand draft, Banker cheque, Deposit receipts, FDR ama agütsüba yimya nung magizüktsü.
Tekalen shia aliba e-tender document indang temetetsütem ajak iba website nung angutsü : www.ireps.gov.in.
Temetetsü : Tender nung temelenshi ali mali, tender magütsüadang imlibilema original tender notice nung internet websitel News paper I Corrigendum nung reprangangma.
Divisional Signal and Telecom Engineer/Ranoiva



World Cup Qualifiers: Sweden, Portugal aser Belgium-i kokogo

June 10, 2017 (Agencies): Hokolbarnü Stockholm nung World Cup qualifier Sweden aser France na tsüingda asayaba nung Sweden-i 2-1 agi kokogo.

Asaya tenzüker minute 37 buba nung Olivier Giroud-i France pur atema mezüingbuba goal agütsü, ajsüüaka winger Jimmy Durmaz-i minute 43 buba nung Sweden pur atema goal ka agüja score kasa aküm. Asaya nung France goal keeper Hugo Lloris-i aibelenba ajanga par telok goal tanabuba achi. Lloris-i box temai ball belenshia adoker Toivonen nem ball rakzükdaksü aser iba sülen pai kecha aibelen mesüi goal agüja Sweden puri iba asaya akok. Iba takok ajanga Sweden pur Group A nung point 13 nguteta temaba jenjang nung France den külemi lir. Temetetsükaji telok ajak nungi temaba jenjang nung tembangba telok dang Russia nung World Cup nung shilem agitettsü.

"Hugo-i aibelenba ajanga onok-i iba asaya makok. Onok ano asaya 4 asayatsüba anunga



Tallinn, Estonia nung Belgium aser Estonia na tsüingda 2018 FIFA World Cup European qualifiers Group H asayaba mapang Estonia goalie, Mihkel Aksalu ball nokdangtsü atema joka atudang tangokba noksa nung angur.

lir anungji iba asayatem nung meranga asayaa onok nükjidong atongtsü merangtsü," ta France coach Didier Deschamps-i ashi.

Maneni World Cup qualifier asaya tanga ka nung Belgium-i 2-0 agi Estonia madak takok ngua group H nung maneni parnok temaba jenjang nung lir. Tallinn nung Hokolbarnü

asaya nung Belgium pur atema Dries Mertens aser Nacer Chadli nati goal kaka agüja liasü. November ita Brussels nung iba linük ana tsüingda asaya nung Belgium-i goal 8-1 agi Estonia koka liasü.

Asaya nung asaya shilem mezüingbuba tatemi Artjom Dmitrijev-i Marouane Fellaini

alangdaksüba atema pa red card agüja asaya nungi togudaksü.

Belgium pur parnok telok nung tanabuba jenjang nung aliba Greece dang nungi point 4 agi timba lir aser taruba küm World Cup nung shilem agitsü asoshi jenjang junga lir.

World Cup qualifiers tanga asaya ka nung Hokolbarnü Portugal-i 3-0 agi Latvia madak takok nguogo. Iba asaya nung Cristiano Ronaldo-i par telok atema gola ana agütsü. Pai tang tashi World Cup qualifiers asayaba nung goal 11 idakja lir.

Iba takok ya Portugal pur atema atonga 5buba takok asütsü. Parnoki Group B nung asaya 6 nungi point 15 nguteta lir, ajsüüaka parnoki Switzerland pur point 3 agi memenepi tanabuba jenjang nung lir. Switzerland-i tang tashi nung khen danga tamakok ngua mali.

Assya nung Ronaldo-i tanabuba goal agütsüba sülen Andre Silva-i tasembuba goal agüja parnoki iba asaya ayong ayonga akok.

Force India mayoktsü: Mallya

June 10, 2017 (Agencies): Force India co-owner Vijay Mallya pa indang Formula One team force India, Australian David Brabham mesera Bernie Ecclestone dang ayoktsü akok ta asüba osangji shidak masü ta jangjatsüogo.

Hokolbarnü Osang benertem den jembidang pai ashiba agi pa India sorkar den temzüng tsütsü timtem liaka pa team mayoktsü ta metetdaksü.

"Brabham den iba dak sendakba nung tang tashi nung pa ajurua sensaksema mali. Bernie kü medemer lir aser yamaji dang alitsü aser iba team ayoktsüba indag kecha jembida mali," ta pai ashi.

Ecclestone ya Brabham team kibur kümogo. Iba team ya asür Jack Brabham-i 1970s aser 1980s mapang ngutet.

Osang kaket ka ajanga taoba ita Jack Brabham'er jabaso David-i Force India alitsü akok ta sangdonga liasü. Maneni tanga osang ka ajanga ashiba agi, arishi küm 86 tain billionaire Ecclestone-a iba team aliner rongnung densema lir ta sangdonga liasü.



Birmingham, Jun 10: Tanü ICC Champions asayamung 10buba asaya Group A nung England o Australia na asayadang England nunger Adil Rashid-i Australia nunger Pat Cummins catch out sütsüba yangi noks anung angur. Iba asaya England-i D/L method ajanga Australia run 40 agi akok.

SUN, JUN 11, 2017 ASAYA

INDIA vs SOUTH AFRICA (Match 11)

Mapang : 3:00 PM



Tanga kin den tesendaktep tajung yanglutsü nükjidong nung DABA (Dimapur Ao Baptist Church) cricket youth team, "building friendship" omen nung ajemdaker lokti balala den cricket asaya ayongzüka asayatar. Honibarnü (10.06.2017) DABA cricket youth team aser Boro Lengri Nepali lanur na tsüingda Govt. College ground nung asayaa liasü. Iba asaya DABA youth team-i makok saka telok ana tsüingda kanga junga asayatetogo. Tayongzüka o tatsüka den sarasadem Jongshimanen (Youth Director, DABA)-i agi. Tarutsü nung kin balala den ano maneni DABD youth tema asayatsü imlar.

Jelena-i French open kokogo; Nadal final tongtetogo

Paris, June 10 (Agencies): Honibarnü French open tetsürtem final asaya nung Latvia tsür Jelena Ostapenko-i 4-6, 6-4, 6-3 agi third seed Simona Halep madak takok ngua la atema mezüingbuba Grand Slam title benogo. Iba takok ya French Open otsü nung rank tekübok nung aliba asayar kati asayamong akokba mezüingbuba asütsü.

Alima nung tetsürtem ranking nung jenjang 47 buba nung alila Ostapenko ya unseeded asayar kati Roland Garros akokba mezüingbuba asütsü aser Latvia nunger atemaa otsü tasen ka lir.

1997 küm Iva Majoli-i French Open akokba sülen Arishi küm 20 tain asayar ya iba asayamong akoker rongnung tanutsütila lir.

"Ni kanga pelar aser tebang agi asitsü o kecha

mali. Iba ya kü pungmang liasü," ta Ostapenko-i ashi shiba iba takok ajanga rank 12bubai atutsü.

Asaya nung la mezüingbuba set nung tamakok angu aser tanabuba set nunga 3-0 agi mokoki liasü, saka lai kanga dang tasüita shot tem asayaa iba takok ngutet.


"Ni takok tashi aggressive asütsü dang meranga liasü. Game anajika asayaba sülen asaya kü tsütsü meyipadok. Ni 3-0 agi mekoki liasü saka ni point ajak atema kanga meranga asayaa liasü.

"Iba takok ya ni tang tashi mamangteter. Iba ya kü pungmang liasü. Ni tanur asüandang iba asayamong repranga liasü aser idak-i asayatsü ya kanga jangratemtsüka lir. Ni kanga jangratema asayaogo," ta Ostapenko-i ashi.

Halep atema iba asaya ya küm 4 tsüingda nung Roland Garros final nung tanabenbuba tamakok lir. Lai iba asaya akok asünungbo Angelique Kerber melenzüka World No 1 kümla.

"Ni kanga mepelar saka tarutsü nung iba asayamong ya ni akoktsü imlar," ta Halep-i ashi.

"Ni Jelena tenüng asanger aser iba takok ya lai



ajangtetba lir," ta laisa ashi.

Kasa mapang nung Rafael Nadal-i Hokolbarnü Dominic Thiem 6-3, 6-4, 6-0 agi koka Roland Garros final tongtetogo. Iba final ya pa asoshi 10 ben buba asütsü, koba otsü tasen ka lir. 2014 küm iba final nung asayaba sülenbo taküm ang pai Roland Garros final tongtetogo.

Final nung pa 2015 winner Stan Wawrinka den asayatsü. Swiss nunger asayar yagi Andy Murray semifinal nung koka liasü.

Wawrinka aser Nadal na tsüingda asayaa aruba nung Nadal-i 15 ben koka lir aser Wawrinka-i 3 ben koka lir.

BIEMDANGANG

"Tali imlara aiben temolung yirur".